

遲廬雜存

曹樹屏
題



著者六十五歲小影



著者十七歲小影



中 醫 師 叢 編 屬 天 雨 詩 酒 大 情
 時 豕 美 除 痕 所 送 銖 聲 豈 律 齋
 臣 翊 紫 時 多 虛 時 得 送
 聖 標 个 物 畫 窗 橫 化 逐 翠 詩 酒
 貴 飛 十 三 嶺 飛 山 舞 業 楊 哥 如
 和 烏 丸 子 察 審 一 對 山 婦 俗 送
 禪 辦 茶 禮 碎 結 眉 點 由 新 有 戒 師



著者遺墨之二



出空若也 古今畫中 成一一精 片楷可 鑒足 價覺不 必絳
 向赤全 內完璧 中幅綉 綉綉 綉
 策調已 家辨認 精采 吾絳 吾絳 絳
 閱然惟 自纒 亂已 采喉 垣
 所古社 豈以 衆本 縹是 闕
 舊尚奈 朝點 見固 程是 闕
 捷真蹟 何所 據而 非是 闕
 知隸真 蹟阿所 據而 非是 闕
 精尹歷 秦訪 尋交 莫能 係
 範向奇 緹果 郊杜 荆益 藝
 古彩粉 埋亦 牽類 是五 眼
 常不繖 綉不 綉蓋 可對 系範
 向不自 吾喉 靡而 甘質 今
 了纒皖 皖城 上元 精環 飾而
 纒斐上 一豈 豐原 叮講 故
 胎以此 都廉 豈當 見躬 講
 開固業 不貧 也本 向自 講
 手頭本 軼上 迨尹 新紉 紉
 出老膠 畫心 師余 真蹟 蹟
 原未慎 驚蘇 堤 鳳 嶂
 不來 稱茂 陶扶 中



斗杓東指婺
垣開爽氣秋
高笏佩來天
保侯妻宜頌
魯德音父母
合歌萊



日未西沈月已中半輪
追逐曜晴空明相知五夜遠
圓滿可許從容詠玉宮

自秋初避難來此忽一四月餘矣時
局沾危甚一日風勢鶴唳朝夕
驚惶大雪節後五日見月有感賦
此由時燕湖戰信正急上下難民
前後軍隊倉皇坐集喘息與忠為
何吟興之有

丁丑十一月初十日望雲并志於大龍
東麓塘灣王氏寓廬



遲廬雜存

石埭徐建生笠雲氏著
餘姚何作鏞校勘



文類

致清道人李梅庵書丁巳仲秋

隱老先生撰席。建辛亥秋在江南財政公所。瞻仰薇曜。時值變亂。坐不安席。話不成緒。嗣後公隱海上。建歸皖中。忽忽七年。先生風節日峻。德望日高。益令人以曾承顏色親警。歎爲幸。建皖南下士。讀書無所得。性喜學書。幼歲囿於行楷。弱冠學隸。蘄於漢而阻於魏。筆姿圓弱。不克振拔。又無緣得宗匠指點。無力致模範碑版。未十年舍而學篆。進退於秦唐二李間。不敢越。尤不敢雜。今且二十

有餘年矣。意在求真。志在見我。真者稱力竭能。無事矜飾。我者鎔鑄今古。自關門塗。近年來意所誠求。庶幾不謬。而志所欲見者。乃戛戛乎其渺難期也。望古既遙。信今彌篤。鄉前輩自懷甯一老外。梁亳州包安吳一偏之詣。粗有所成。自非北平諸城輩所能及。最近惟張廉卿何煖叟各具作意。自立家數。再降而求諸時下作者。并檜無之。詎亦國家運會使然歟。先生書名滿天下。震中外。建獨不肯附和時論。且極疑詫。舍弟淮生字漢侯。一字醉石。膺兩江師範國文講席。服先生教甚久。其初作字近宋近墨。專意摹倣。近年悔悟。力改筆境。特異而窳。自不殊。建甚惜之。夫先生固古今之專學六朝者。六朝書用筆之法。最明顯。新舊出土各小篆。誌尤爲謹嚴。精卓有目共賞。至於峪鑿之類。以及造像石幢。同出市匠手筆。唐宋諸大家所爲。不屑齒及者。建見先生書不下百十幅。求其起伏轉折停頓變換之迹。一莫能得。果真渾穆乎。抑別有奧窔乎。田見其用筆也。

似搓挪而實填。其用墨也。似沈著而實滯。至碑版所未曾有之字。與夫偏旁閒架無所假借者。驅遣結構。尤不相類。是何故耶。更其甚者。每臨漢隸。輒題其後。曰參用六朝某碑筆意。是又何故耶。學馬班文。參以韓柳句法。學風騷詩。參以李杜律調。豈非文壇怪事。藝苑創聞。飾金玉者。告人以參鉛硃。飯膏粱者。語人以參糠粃。謂可增價值。益滋味也。有是情理乎。所臨既渺不相涉。所參尤似是非。兩無所依。一無所取。譬之效西施之顰。參以無鹽之笑。遂令見者。駭愕卻走。不忍卒視。果其是顰。是笑。雖妍媸雜呈。而滑稽有致。惜乎其顰且笑者。究未知西施無鹽爲何如人也。倘能精學六朝。抉擇不謬。表裏洞澈。亦自足以名家。何必高談漢法。始盡冒古眩俗之能事哉。天下後世不可欺。建所羨望於先生者。正在天下後世。一藝之微。累及大德。竊欲以求真之意相質。或不悖於坏壤細流之義歟。晚近負書名如康常素。張季直。鄭蘇龕。諸公。下至吳昌碩。曾農髯。

叢建雖曲。憐深惡。不願以一言相交。而獨爲責備賢者。傾吐宣洩。不稱恤。良以心折先生品誼。不慮失言。且忘其慧。或竟以此諒察狂愚。辨析謬誤。開發而明教之。則受賜實多矣。近來商僮販古牟利。借重名人題跋。此中鑑別迎拒。尤宜嚴明。識別不真。寧從闕置。吾人聲價終有定衡。不可取快一時。過自菲薄也。臨穎神往。不盡依依。祇候道履百益。

致陳劭吾

惟彥書 戊午孟秋

劭公姊丈大人左右。三載不通賤候。非盡疏懶。思擾清神。夏仲在甯。詢譖起居佳勝。至爲欣慰。弟未老先衰。志氣益短。比於苦力。強顏依人。惟眷屬和順。凍餒不渝。心境較坦淨耳。此次鄉人選舉。風潮頗烈。弟覺兩方均有不是。夢樵急近名利。手段過激。澤民等初選落第。忿而鬻爭。私意瀰漫。託詞公憤。弟於兩方皆世交雅故。始終極力調護。顧全局。初聞劉知事按名搜捕。比卽面求省長。電

縣聲復。乃忽來一滬同鄉公電。竟稱據弟函報云云。殊深駭詫。省長當交選舉事務所核復。嗣聞澤民等自認冒昧。事前疎忽。未及預告。此舉荒謬特甚。弟本純粹調人。何得袒徇一方。偏肆攻訐。比時雖於省長前聲明冒名。而疑總不釋。加以劉道章輩。無知勢要。逞橫乘釁。吠聲吠影。弟固信天任運。並未以一挂名祕書爲輕重。惟形迹上著此污點。心實不甘。複選已過。兩方得失已定。滬同鄉能否致函省長。爲弟聲辨。（卽言據弟親筆函滬聲請亦可）請執事酌度行之。此後弟絕對不與訴訟人接近。結果如何。決不過問。此事頗與曩年公渡稟案事相類。造次報應亦不爽。令人憬然。但一則心急公益。一則弊出私爭。根本上乃大不相同。所遇亦有幸不幸耳。暇適示復數行。藉諗清況。尤所希幸。耑布祇請健安。諸希鑒諒。

孫北垣

廷輝

先生八十壽序

戊午仲秋補作

民國紀元之七年。戊午五月十有三日。爲我表兄孫北垣先生八十壽辰。建墓滯皖垣。相睽數百里。不克預於稱觴獻畢之列。而馨香祈祝之意。則固不爲山川所阻隔焉。我中表行輩中。先生齒最長。憶童時白門初相見。先生已有鬚。先妣湯太宜人指以示之曰。吾姊苦行節孝。得若子爲不負。吾不知兒將來成立何如。吾之福能如吾姊焉否也。若年小於兒父不十齡。小子不當僅以兄事之矣。後二十年建還鄉里。見其治家之謹肅。市肆規畫之整齊。族黨里閭推崇而稱頌之者。無間於人口。愈以念先妣之言。而景慕之愧弗及也。先生幼值亂世。讀書通大意。迫於生計。棄而服賈。精計術。善居積。無億不中。有操必贏。先後二十年間。赤手經營。家業蔚起。亂後喪葬。備物致誠。恢復故居。旌揚先德。漸次畢舉。成功燦然。而好義勇爲。尤具至性。生平兩建宗祠。一修族譜。皆身親其役。雖祁寒盛暑。不少輟。籌款措贖。甚且貨產稱貸。事成而累集。靡役不損其私。

而自樂之無悔。族衆以是益多之。稱道至今不置。邑中公益慈善諸事。無不竭力提倡。勞費並致。往往移賓筵。觴會之資。修輯橋梁道路。人情所罕見。行之若固然。居恆歆歆不自滿。與人言喜作淺近親切語。賓朋喧嬉譁笑。則木立隅坐。如不相入。接見戚友。後起少年。諄諄勗以勤儉。剖析事業人情之要。所交無論久暫。所遇無論老幼。肫誠相諒。無與忤者。望愈重而氣彌和。年愈高而神彌王。清明貞固。天錫甯有既耶。子履亨與建同案入邑庠。游南北。所至有聲。孫男五人。俱英俊。有學成致用者。曾孫輩亦振振繼起。建母黨姑黨之戚多凌替。表兄弟殂謝殆盡。齒尊如先生。獨巋然多壽而備福。其亦吾中表中之魯殿歟。建行年五十。落拓不自振。頭童齒豁。猶恃筆墨爲傭。天幸如蔗之甘。假我數年。際會稍稍餘蓄。歸老鄉園。卜宅與先生鄰。歲時伏臘。隔離相呼。簪屐躋堂。添籌競入。祝九艷。慶百齡。萊衣之前。棣萼之末。亦有婆婆白髮。抗雁行而晉兕酌者。

乎。敢券以斯文。待驗於異日。不僅僅爲大年純嘏之頌已也。

復沈亭吾孝廉

葆蔭書 戊午季冬

亭吾仁兄有道撰席。秋間誦片示。紹田來又述拳注之篤。日前仲綬帶到手教。屢與晤言。頗譚起居近況。欣慰之餘。愧歎迺益無既。昔人謂慣遲作答。愛書來弟。則不僅於遲矣。道義相契。合耆好同甘苦。其格格欲傾吐者。絕非泛泛數行所能宣罄。徘徊審顧。愈久愈難。否則筆墨爲生。傭於簡牘。歲每千百函。日或數十紙。豈於故人而轉吝其金玉耶。懇懇寸私。甯引疏嬾之譏。不作敷衍之答。知心如兄。當信非飾詞之辯護也。從者作篆。取徑於繹山。甚高。乃更上追石鼓。實所未解。春間寄示臨紙。不見真意。周秦字絕無鼓努側媚者。鼎彝獵碣之類。其支離頓挫處。皆金石剝蝕痕迹。後人認爲波磔。易於描摹。倣效。率然相尙。冒古欺今。良可悼歎。篆字要於平正中見力量。成功而後。汪洋恣肆。無之不可。而仍

歸結於平正。竊謂學篆當以小李始。以大李終。小李城隍謙卦。最宜初學。稍進則庾公德政。漸有秦意。會稽絕少善本。繹山佳搨較易得。秦山之不二殘石。字雖少而本末畢具。得古人一二字真諦。可以出神入化。碑字固不在求多也。峴嶼三闕神識。與鐘鼎石鼓等字。但供玩讀。取其意趣爲我遣筆構局之助。元氣盎然。精妙無比。若令人望而知爲臨禹臨象。寫器寫鼓。則一雕刻匠材。鈎摹影子而已。吾兄寫石鼓久且勤如是。試問曾有一筆一字不涉矜持。不假做作。而能得車攻吉日之形似乎。此等矜持做作。何時始能純熟而脫化。卽熟矣化矣。其於學力之本原。功候之成就。究何與乎。古今大小書家。有以臨此等碑字稱者乎。而其弊可使終身不能更作一平通中正之字。如清道人寫爨。今日之現象是也。謙卦翻本。輪廓已失。醜謬不堪。城隍元神尙在。起落分明。德政則規模完善。姿態從容。學篆至此。能事盡矣。由是溯源於秦。秦碑多數爲陽爻假託。

惟權量中尙有真意。故有石不如金說。稍稍渾樸。自能空所依傍。獨樹一幟。秦後唐前。可以節取爲我助者。僅一三公山而已。餘子一概不必相識。弟初頗爲鄧山人搓挪吞吐所誤。漸悟漸悔。一以瘦勁沈靜爲主。近十數年來。兢兢凝斯之間。毫忽不敢放越。生資鈍弱。雖無所成。而於敬肆之原。形神之界。純駁之分。潛究深研。具有甘苦。如上所論。致力時必須專注。必須禁避諸端。皆從困苦體會中得來。而爲古人未及言。今人不遑計者。此道之難如此。茫茫前途。尙不知有幾許幽折也。吾兄乃有同志。抑亦好爲難自待不薄之意。往日相知之雅。虛衷下問之殷。感觸激昂。傾吐不禁。吾人落拓本具一種偏僻孤陋特性。不求諒於人。人亦不及諒我。詫爲怪誕。疑爲矜夸。偶有問者。但先自認笨拙。模稜謝之。不敢真言得失。自取訕謗。而每當掩卷凝神。輟筆長歎之際。又深恨無一同道至友。能斥我妄。能攻我瑕。能鍼砭我痛癢。隨聲之譽。隔膜之評。營營擾擾。其

累我周旋。耗我精力者。甯能忍而與之終古哉。春初因與從者論漢魏字法。有所激觸。比曾具書致清道人。力訐其短。本責備賢者之心。冀其剖心自辯。反唇相稽。必有所開示而啓發我者。乃遲久闕然。嗣聞醉石舍弟言。此老向不以書復人。矧又難乎置答。是無可望矣。函中有可採錄語。檢出謄稿一分。附呈清警弟。近更多病。傭役於公。心緒益劣。每欲謝絕應酬筆墨。格於情勢。苦不堪言。夏仲因友喪往甯。住西園五日。移奇望街張舍親處七日。始阻雨潦。不能出門。繼患痔瀉。艱於動履。諸友戚處。一未謁候。歸後追思。愈增結轡。飲啄會合。果前定歟。永清立軸寫成。交仲綬。龔公去彼無留意。不久當返白門。承索書件。稍遲必有所獻。弟素喜鐙下作寸許篆。目力銳衰。久不能爾。昨購得老光較深之鏡。怵怵思理故紙。將來或卽以此報命。輿會之作。不拘篇幅。庶易從事。紹田兄回甯度歲。冬初曾爲渠作桃源記密行長幅。工力太費。完璧尤難。兄與晤時。可索一

觀弟皖居七載。鄙僂無朋。地非通都。人尤寡合。生長釣游之所。臺城鍾阜。時繫夢魂。學界中尙有我輩託足之隙否。與鍾叔進諸兄談次。乞試一商籌之。何如。夜雨凝寒。倚鑪剪燭。如與故人話舊。媿媿不倦。時將四鼓。紙已十易。意固未盡。而目力腕力已不耐矣。卽此祇候道履。竝頌歲福百益。

右爲二十年前之作。論篆處雖未充分精選。而原始要終。取徑純正。未始非小篆津梁中之明證也。

晚近稱小篆曰鐵線。甚且合鐘鼎籀古闕鼓統名曰篆。千百年來。懵懵沿誤。此道幾廢。唐以後作篆諸家。偶有論說。亦未能斷然標揭。至於功力過程。甘苦眞際。竟無明白指陳者。豈果限於識力不能言。抑皆祕吝而不肯言也。

湖北咸甯袁氏譜序

己未閏七月

國無法則亂。家無法則衰。國法著於典章。家法根於譜牒。欲治其國。必先立紀綱。正禮樂。重爵祿。審刑罰。而後政教威德有所施。欲治其家。必先明支系。別尊卑。叙昭穆。辨疎親。而後孝弟敦睦有所勸。吾國襲法治之名。無立法之實。倉皇營擾。以至今日。而卒未大亂者。其亦吾民私守家法。有以彌縫而維繫之耳。故家巨族。典範猶存。世德先疇。耕讀未輟。入宗廟。分胙餘。會歲時。曝家乘。其敢於藐敬恭。而恣桀驚者。尙不多見。是則家法重於國法也。尤其彰明較著矣。咸甯袁氏修譜既成。藜青先生述其世系纂輯之由來。以屬序於余。夫藜青固久官於國中之司法界者。今且亟亟於此。毋亦禮失而求野。觀變而知本之意乎。吾鄂四塞之衝。世變不已。民力罷矣。安得有人焉。以治家之法治國。以修譜之法修庶政。內患救平。元氣蘇息。吾鄂或亦首蒙其澤歟。則以余所傾慕於袁氏者。推而致其希望於天下焉。喁喁懇懇。甯有窮哉。至若袁氏受姓之原。與其支派。

演繹之盛。藜青自述之既詳。且盡集淦川蘋溪之秀。蓬勃鬱發。方興未艾。比之汝南陽夏。夫豈多讓。抑吾聞之。袁氏自陳留以下。無二系。民國初元。項城總統。嘗有創修大同譜之宏願。洎其晚政紛騰。未暇及此。論者惜之。而袁氏之族大澤遠。則又從可想矣。

右爲代安慶道尹胡改庵作 應安徽高等法院檢察廳長袁藜青之求

祭馬子良文

辛酉秋

嗚呼子良。有壽者相。而乃蚤亡。無慙德事。而乃病瘍。才不可掩。而命勿彰。功不可沒。而績勿臧。洵報施之顛倒。抑理數之微茫。縱藥石之莫救。胡刀圭而致戕。上承覆幬。下逮袍裳。同聲一痛。吁其悽愴。旌旗爲之改色。風日爲之韜光。鼓鼙忽咽。饒吹不揚。萬籟俱寂。百度失常。本男兒之壯志。比馬革於沙場。雖身名之弗逮。亦哀榮之少償。然而天不可問。情不可詳。初膺籌筆。繼典轉饜。十年戎馬。

三軍府藏。精儲未集。條理未張。如汲失綆。如網失綱。負高深之倚畀。竟摧折於倉皇。況顯揚之未遂。增慘痛於高堂。況封侯之悔覓。貽冰蘖於嫠孀。庭桂甫植。穉蘭初芳。將繩祖武。遽闕義方。遼天雁唳。有弟陟岡。瞻望勿及。來持其喪。家庭沸其震盪。旅殯颯其淒涼。綜無窮之期待。變不測之禍殃。嗚呼子良。病酷於殺。性誤於彊。不圖癰疥。竟入膏肓。沈駘爲崇。著龜不祥。缺天陷地。夏雹春霜。茫茫慘劫。渺渺仙鄉。悵人琴之俱杳。睇梁月而增傷。甲馬靈旗。無可挽。隻雞斗酒。其孰將。丹旄戒途之日。白衣祖帳之場。煙雨凝愁而黯澹。江潮咽淚而激昂。薦茲清酌。介以羞漿。魂兮不沫。飶其馨香。嗚呼尙饗。

致全院教育界代電

癸亥春初

安徽各學校教職員。教育會諸先生。教育廳長均鑒。居鄉旅外諸同鄉父老士紳同鑒。痛自吾皖學潮迭起。禍亂頻乃。就學青年。重者喪其身命。輕者荒其學

業終年紛擾。專供利用者之武器。揆之我輩竭精力。耗資財。遣送子弟求學之本心。負痛呼冤。如罹慘劫。現在又值春季始業。牽衣負笈。欲罷不能。睠念前途。慄慄危懼。除各切誠子弟專意求學。莫問他事外。謹用三跪九叩泣血搏頰。求告於教育界各前輩各師長之前。伏乞大發慈悲。俯賜矜恤。捐除各種意見。放棄各項作用。實行教授。彌補課程。使學生不受意外傷殘。家長不受極端激刺。誰無子弟。誰非父兄。血肉可憐。光陰可惜。良心同具。公道未亡。學款自有官廳主持。姜案自有法律解決。天心厭亂。童孺難欺。莫再以多數青年之成敗死生。博少數個人之名利揮霍。鄉人父老。尙希一致扶持。軍民長官。尤望互相諒解。成人成己。造福無量。惠愛鄉邦。垂名不朽。教育前途。治安關繫。又不僅鄙人等爲學生家屬者感戴頂頌已也。

祭四省剿匪安徽陣亡將士文

維民國十有二年歲次癸亥。孟冬日。皖北鎮守使兼蘇皖魯豫四省剿匪副
司令史俊玉。率全軍官佐士兵。開會追悼我傷亡將士某某等。謹爲詞以祭之。
曰。嗚呼勇士。竟爲國殤。嗚呼小醜。竟殲我良。旌旗爲之變色。刁斗爲之不揚。聲
震原野。哀動袍裳。繫維在昔。訓練成行。敦詩說禮。有勇知方。萑蒲告警。比鄰爲
殃。簡我精銳。協戍邊防。驚傳蹂躪。日擊披猖。軍心憤懣。士氣激昂。亟張撻伐。猝
冒欖槍。追奔數百里。血戰數十場。咸殺敵以致果。思除暴以安良。而乃天心造
劫。福眚無常。癰疥粗去。肱膂迭傷。裏創再進。飲彈先亡。衣殷熱血。甲紉盤腸。刀
圭束手。星日韜光。嗚呼戰陣之事。義本相殘。男兒報國。死亦所甘。惜乎虎暴。僅
殉跳梁。惜乎馬革。不蹈巖疆。縱聚殲其千百。甯萬一之抵償。嗚呼噫嘻。此恨彌
長。折我指臂。鉞我肺肝。寡妻孤子。慙其悽愴。纍纍旅櫬。邱首何鄉。天陰聞哭。嘶
馬驚霜。魂待招而不返。功在國而難亡。掬三軍之痛淚。爇一炷之心香。慰以悼

誅。薦以酒漿。靈兮不昧。飶此芬芳。嗚呼尙饗。

懷甯耆紳方某

蔭棠長兄

七十雙壽序

丙寅秋

吾誦詩至雅之臺萊。頌之闕宮。未嘗不歎壽之所以致人頌祝者。初不在爵位之高下。與禮文之重輕也。一國之君。一地方長吏。仁政惠澤。及於人者。既久且洽。下之民深惜其行年之既髦。而愈覺其晚景之可珍。弧悅之朝。松喬之日。相與獻羔酌醕。揚觶稱觥。躋公堂。拜宇下。樂德音於父母。綏純嘏於侯妻。嗶嗶喁喁。一再言之不能盡其意。噫。一何肫切深摯之。至於斯極耶。由是推而至於族黨所尊崇。門庭所矜式者。情事感召。何莫不然。然吾見夫今之言壽者矣。強藩魁碩。政客名流。貪婪聚斂之不足。猶復巧捏名色。假託事由。以爲腴削搜括。擴張勢力之助。自是而稱壽之說。日益繁興。高堂白髮之尊。開府黑頭之傑。嘉辰令日。踵事增華。樞廷之墨翰遙頒。僚佐之駢詞競奏。震動遐邇。焜耀當時。又或

施於兄弟。逮及兒曹。連類鋪張。一歲數舉。詩文濫譽。甚於擲揄。酒醴憎煩。易以寶貨。變本加厲。靡然成風。三旬四旬之年。亦開壽宇。千金萬金之賄。借曰壽儀。凡此之倫。迹無行狀。非惟無仁惠之可言。其平日流毒於閭閻。貽害於邦國者。天生使獨之疑。日亡與偕之痛。沸騰蘊結。莫可訴陳。彼且束牘遍徵。興高彩烈。觥籌之費。無非府庫金錢。酬獻之需。幾許蒼黎膏血。遂使有識之士。一聞致祝。稱慶之說。嘖蹙歛歔。若不勝其厭惡者。然則壽不足言乎。亦曰視乎其人而已。間入淳樸之里。詩禮之家。累承忠厚之風。粵有期頤之瑞。彩觴祝嘏。斑衣娛親。子姓盈前。親朋萃集。雖無金玉文繡冠蓋車馬之煊赫。而其情誼孚洽。熙熙然有可慶可紀之實。一喜一懼之誠。里巷播爲歌謠。婦孺資爲誇述。其意義適與闕宮臺萊相近。是壽之見重於時者。不在上而在下。不在顯貴而在布素。不在交遊之標榜。而在真意之涵濡也。豈今之習俗特異歟。蓋風會之變。人爵濫而

天爵益尊。覘世運者每於此深致慨焉。〔下叙蔭棠爲兄稱壽。丐文並述其兄行誼數百言。無關文字。因省錄之。〕蔭棠之言若此。吾不美其得年之修。獲福之厚。祇此立業之堅固。家政之整齊。萬萬非晚近名公鉅卿。豪門右族。所能幾及其十一者。豈宇宙清明之氣。不及於閭閻。而特鍾於草野歟。抑狗爵祿者忘其本。而命素者全其天歟。吾又聞之。方氏之家若店。所以算無遺策。蒸蒸日上。者皆蔭棠之力也。省市人士。類能知之。而右述之言。乃無一不歸善其兄。是其家庭昆季間。友恭敬愛之誠。又非咕嗶小儒。口詩書而貌禮度者。所敢輕與比倫也。時至今日。道德綱常。幾於澌滅。蚩蚩小民。卽或未罹戰禍。搆匪劫。而徬徨迫促。若不終日。上之主政教者。偷息節鉞之下。非悉索之務盡。卽網羅之橫張。朝令暮稽。無復厚風俗培元氣之望。所恃鄉閭里巷中。一二不求聞達。不驚新奇之人。植身橫流。希蹤太古。以維持倫紀於不絕。其人康彊逢吉。其家休祥荐

臻。庶使縱橫強豪輩聞之。憬然愧悟於萬一。而篤行屈抑之士。亦以知仁者壽。大德必壽之說。信而有徵。而修飭持循。不至奪固窮嚮善之志。其關繫於人心世道也。又豈一人一家之私慶已也。吾縱不文。亦樂爲之錄其實云。

復胡寄塵懷琛書

丁卯秋

寄塵先生撰席。月前奉讀惠牋。並詩集一冊。病憊中僅綴律句誌慕。遲遲未能肅復。至用疚歉。嗣又迭誦賜實兒書。取節錄瑕。不遺巴里。加以小兒勞獎掖之勤。亡女僭表彰之列。（先生曾爲余亡女璞汝於其主編之小說世界某期出專號紀念）高情厚誼。迥越等倫。從來文字相感。別有因緣。傳與不傳。終是佳話。小兒自接沐大教後。兩年來仰鑽淬厲。滋益不少。惜其蒙養太薄。不易有成。鄙意總想於滬濱爲謀一館地。食宿有資。得以親炙洪鑪。涵濡化雨。將來造就。或許帳前走卒。分張一軍。弟生多俗骨。三十年前汪穰卿先生（康年）曾勸就

某滬報編輯。(時申報外僅新聞民立成立未久)爾時科名心熱。且正從幕路。礦館況尙優。不肯舍去。民國初年。爲馬通伯牽入安慶高校講席。周越然兄曾有合譯小說(彼英我漢)之約。私心良喜。旋又經亂散去。莫可追尋。前後四十餘年。橐筆奔走軍政兩界。時斷時續。忽高忽低。論事則百無一成。論學尤十荒八九。向之所謂編輯繙譯。一誤再誤。以致造成今日之文藝落伍者。歲聿云暮。悔將奚追。故於小兒稚年。卽縱之說部筆記之林。不稍束以繩墨。近得宗工提挈。鼓勵前進。喜其率由之不謬。慮其成就之倍遲。瞻顧徬徨。益慙老悖。先生其何以教之。亡女璞汝。以我不德。致夭其年。淚灑碎珠。貽譏達者。幸蒙章飾。慰及死生。前呈篆幅。過承獎借。弟於書法一得之愚。妄思砭流俗。後如健閒。有所發抒。當再呈獻。先生壇坫賢勞。極不應以繁詞奉擾。乃感念之深。希幸之切。不得不稍稍傾吐。藉致精誠。肅復鳴謝。敬頌道綏。諸惟亮察。

紀五弟醉石暨其配蘇淑人事略

余同祖兄弟凡六人。醉石行居五。與余同年生。相後僅四十餘日。在儕輩中。同負幼慧之目。而醉石姿性尤沈敏。爲學至勤。故其成就過余遠甚。乃少壯蹭蹬。文場垂老困於窮乏。則又如出一轍。所異者兒孫滿前。留遺詩文稿不少。得福與名。或卽天之所以報篤學歟。然亦僅矣。醉石生於清同治八年己巳九月某日。名淮生。字漢侯。爲先伯父圭峯公季子。生卽厚重。寡言笑。襁褓如成童。八歲屬對綴文。見者驚異。十五入邑庠。越年科試高等。食餼。意氣干雲。芥視青紫。乃嗣是以往。七戰秋闈。皆北。迭次薦備。輒以額滿而遺。房考官至爲扼腕。爭持。迄不得請。吾家累世清貧。白門僑居益不易。先伯父館穀微。而食指日增。醉石自婚冠後。卽恃鍾山尊經惜陰文正諸書院月課。膏火所入。補助薪水。而堂上甘旨。委曲必備。往往深宵帷側。一燈熒然。苦吟微哦。與刀尺兒啼聲相間作。

晨雪沒塗。笠屐彳亍。持課卷盈束。汲汲繳納。歸檢案頭燭。淚疊結高寸許。堅苦奮勵。生活於此中者。殆二十有餘年。其至性過人。奉親侍疾。以及喪殮殯祭。竭誠盡禮。人以孝稱。先伯父暮年病憊且久。先伯母楊太淑人先卒。扶掖抑搔。廁踰唾洩。醉石躬率子婦。體察微不至。最後衣不解帶。目不交睫者。歷三月之久。當先伯父病篤。正庚辛併科報罷。而諸姪同懷三捷之時。慮者恐其憂忿。宛轉勸慰。乃笑答曰。青氈能展。總洽親心。子成孫成。有何界別。吾且欲減祿續父壽。劉蕡下第。夫何憾焉。自是益鄙薄科名。捐棄帖括。一肆力於古文辭。涉獵諸子百家之說。發爲詩歌序記。灑瀚沈鬱。無往不見性靈。其爲文遠紹昌黎。近挹桐城。第不屑屑於字句閒求合繩尺。其詩則與東坡長慶爲近。吟草尤富。中年後益喜游。遇佳山水。流連竟日不忍去。勝蹟名區。力所能赴。雖寫遠幽曲。必探究竟。游必有詩。詩亦因游而日進。幼時卽以能書名。少長出入晉唐。姿致俊

拔。嗣任兩江師範講席。與清道人交有年。遂亦摹寫金峪龍寶二爨相競勝。道人推獎歎弗如。旋覺此等字無實際。乃擷蘇黃之精。參以魏隋之妙。其楷漸入渾化。每際閒困。輒恃粥字爲贍給。他如圍奕篆刻。陶冶天趣之事。時樂爲之。己酉鄉人公舉孝廉方正。朝考一等。以知縣籤分河南。更由師範保案。獎晉直隸州知州。民國元年。主講安徽高等師範兩校國文學科。與當事不合。愴然引去。旋受知於蔣某都轉。入兩浙鹽署任秘書。修鹽法志。兼第四師部秘書。先後六七年。飽飫湖光山色。與六橋三竺閒名流相往還。贈答詩文益多。聲譽益盛。極一時登臨抒寫之樂。雖曰書生本色。而得蔣公提倡維護之力。至多且摯。知遇之感。時見話言。其畢生精力。瘁於劬學。中年得眩暈心悸疾。經歷喪亂。銷燬彌甚。近歲杜門養疴。境地棘促。今年夏仲之末。竟以中風謝世。年僅五十有九。遺有枕雲居詩文集若干卷。楷法三十種。印存聯語數冊。未及印行。娶同邑蘇

氏號雲英。婉淑有則。事舅姑。睦妯娌。育子撫孫。慈孝溫惠。內外無間言。槃匱筭。縱之暇。漸漬翰墨。研習音韻。以吟哦爲唱隨。有枕雲居唱隨集一卷。吾家近六十年來。姑婦娣姒間。以福德兼備稱者。自先母陳太君下。一人而已。惟是荆布井臼。歷盡艱辛。婦則母儀。何一不從。精神氣血中。淘淬而出。甲子臘初。金陵潰兵譁變。中宵驚避。痰急氣塞而逝。是尤醉石晚年慘痛最劇之事。生子三。紹聖。紹舜。紹智。長。撻痼疾。畢業師範。而不能致用。次三。皆精幹克自立。女二。長適歙縣程氏。次待字。孫壽民等十人。孫女三。亦皆因年授業。漸見頭角。嗚呼。往矣。余以衰病後死之軀。覘然爲此挂漏之紀述。而兒時聚處。懷橘棄李之事。歷歷在目。惜乎文字荒劣。無寫生頰毫之力。所以闡揚吾弟者。實不稱余心之十一也。迺者聞蔣公有資刊遺稿之舉。一介寒微。能得知己。竊不禁爲醉石幸而名山千古。我終何之。後顧茫茫。彌自恫矣。

先王父調庵公。遺有詩文集四卷。先伯父圭峯公。遺稿亦稱是。二十年前。我兄弟曾有合力參校選刊之議。甲子秋末。余過白門。醉石愀然曰。兄不督責。弟不奮勉。此事恐終廢也。嗚呼。言猶在耳。約豈忘心。而醉石奄忽不再待。余又謏陋不堪。獨任庭楹手澤。坐視湮置。疚心負咎。將何極耶。舜智二姪。擬於枕雲集端。坳載曾若祖遺稿數篇。冀竝不朽。意固甚善。而果可行耶。且又何以爲擇耶。坳述於此。以志吾痛。以彰吾罪。而更爲萬一之期待云。

字話序

丁卯孟冬

我書至拙。然寫最多。且久。不敢言有所得。而不能謂無所見。近今字風之靡。尤令我不能無言。平日性所耆溺。心所感悟。手與目所經歷。筆而紀之。不厭瑣細。今乃刪節之成一卷。列爲閒話集中之字話類。擬先出以示人。冀或有裨於時。

也。愚夫善憂。言多偏激。閱我話者。或將有以匡我。糾我。詰我。責我。則我實受賜矣。古人喜聞過。我於書亦云。乃一生罕遇直諒。諛者曰甚好。諷者曰尙好。徘徊躑躅於甚與尙之間。五六十年。去好之境地且益遠。我之於人也。自覺不薄。而人之於我。乃終無厚乎。我將更竢之。

傅青主行書殘冊跋

己巳長至前五日

傅青主先生巨幅大字。筆氣橫絕。其孤懷積憤。寄託而發洩者。往往增人歎賞。昨過張力仁先生齋頭。忽見先生行書十九首殘冊。字不及寸。計五頁四百餘字。驚詫乍疑不類。而其精勁渾灑。非負絕大之奇氣。至詣者不辦。後人無能摹倣。人苟善書若此。必不肯冒先生名爲重。我作篆三十餘年。殊未料行書中有此境地。審玩竟日。不禁焚香對之肅拜。有人訝其筆意類安吳。我謂倘以此冊令近今摹包派有得者細讀。至少亦可揭破安吳晚年欺人自欺之誤。力仁收

藏千年來名人筆墨頗多真蹟。此冊與蔡君謨小簡。尤爲世所罕見。篋笥琳瑯。其亦雅人中之碩腹乎。令我健羨不已。

嗇廬本工篆隸。其論書嘗謂。甯拙毋巧。甯醜毋媚。甯支離毋輕滑。甯真率毋安排。觀乎此冊。益信斯言之甘苦深摯。如箸畫灰。如錐畫沙。純乎能以篆法作行楷者。

游迎江寺記

寺在安慶縱陽門外半里許有鎮風塔七級爲長江浮屠最巨者

庚午中秋後十日。馬伯瑤兄偕諸書閣。舒鐵香。張國藥。王選青諸先生。及建游迎江寺。具伊蒲饌於大士閣下。監院竺庵。住持密光二上人。以地主參陪其間。清齋雅集。不談國事。惟各述游蹤異聞。相與笑樂。不知時世有離亂事。國藥先生舉其歷年官魯。收得之唐同光時鐵造佛像一幢。古銅佛二座。古銅彌勒佛頭一元。小銅佛一尊。願卽捨置寺內供奉。古色斑斕。寶光璀璨。比之山門玉帶。

雅俗何翅宵壤。竺密二師要約翌日仍至本處午餐。意肫切不可却。建感於佛家物事之宜歸佛地也。爰將曩年篆書金剛經一冊。持作布施。座客傳觀。以其用筆之不苟。與成功之不易。咸相歎賞。竺師尤歡喜讚誦。國藥先生憮然有閒。急馳歸。携一手卷來。展視則爲明魏忠介公大中。臨決前日。獄中書示家人之遺屬一篇。幅長六七尺。細書千餘言。條列身後殮葬法制。處分家事各節。委曲詳盡。意志從容。文字亦沈著整肅。生氣凜然。讀者嗚咽震惕。不能成聲。噫嘻。何其深切感人。之至於斯極耶。國藥并付寺僧保存。但屬爲魏公立木位。設龕供以資景仰。卷首有王世貞題記一則。梁章鉅隸書碧血丹心四字。鐵香先生鈔錄明史忠介本傳。埒入卷內。斯游也。誠吾人之莫大因緣。所以爲迎江生色者。甯可數計。而建之翰墨。亦且依埒以增重。則尤非分之厚幸矣。

醒生仁兄撰席盤椒獻後。寒雨初晴。爆竹聲中。朵雲忽降。遙想棠階春早。驩忻式洽東南。更看蓮幕才多。駢儷未忘四六。雷時爲天長縣科長來書駢句賀年書成兩葉。筆燦千花。快挹清芬。引敷頌藻。弟碌碌衰庸。年年厄閏。駒光倏逝。慙馬齒之徒增。鮒轍久枯。比蠶疆之自縛。漫天風雪。羞出戶庭。誤我煙雲。待焚筆硯。難得故人千里。依然垂念龍鍾。未知生氣三春。能否重申蠖屈。江天迢遞。問握話於何時。風日煊妍。祝扶搖之直上。崑此奉覆。祇頌春祺。

巢縣陳善人記

建與輔周益齋昆季交有年。見其歷典皖鄂諸大郡。治聲政績。雖迫時勢不能盡量發揮。而其敦厚任俠之氣。則已無往而不表見。旣而審其家世。乃歎其卓卓如是者。蓋有所由來也。尊公偉人先生。卽居鄴人。稱頌普著之善人也。善人之名。不自先生始。而先生實極其盛。而綜其全。陳氏富裕冠全邑。以上三世皆

仗義好施予。善人之謚。幾成世襲。迨先生時。封儲耗散殆盡。而好善益篤。行善益力。始猶變產以救人。繼且舉債以徇義。爲人居間。輒被牽累。爲人擔保。終代償還。人欺以方。不怨不悔。馴至除夕不能自舉炊。從戚友貸米二斗。歸途遇垂涕告急者。分其半與之。前進又有所遇。又分與之。比入家門。擲空囊地下。登榻蒙被僵臥。意恬如也。夫人夏氏。樂善之性。夙與先生。訴合斥簪珥。質衣衾。雖至艱窘。必委曲襄助。略無怨沮。先生歿於民國乙卯。壽六十。易簣之頃。猶諠諠以爲善勗二子。夫人先七年歿。前後兩喪殯葬之日。不期而會者數千人。婦孺有哭失聲者。嗚乎。以先生之德量。上躋卿相。可以致安懷之業。下假尺寸。可以宏撫字之仁。而乃僅青一衿。僅名一邑。勤勤懇懇。終其身以善人著稱。論者能無惋惜。卽在先生自視。亦自覺善量之未充。而有待於後人。然則輔周昆季。所以承先而光大者。當不僅以一麾通籍。百里甘棠。爲可告無忝也。

復胡淵如遠濬簡

壬申春初

淵如長我三月

淵如先生大鑒。昨夜承示獎借過甚。祇益惶慙。弟近年極少作詩。尤不願和詩。興會不同。氣韻各異。牽強爲之。那得合作。尊稱何遽丈我。論年論學。私心竊以兄事。若執鐵華行輩。則是推鐵華之愛。不屑與我直接論交。何遠我之甚耶。昔年方賁叟亦曾謙稱弟亦以此詰之。後遂不爾。務望從者。亦諒此誠。許附抗行之列。莫再令我不安。幸甚幸甚。此復祇頌道綏。

新皖鐸報十周紀念啟

革命重在宣傳。宣傳首推報社。新皖鐸日報。致力於此。今已十年。此十年中。實爲宣傳最困難時期。亦即宣傳最得力時期。所爲堅苦奮鬥。不知幾經波折。幾經摧殘。成績昭垂。以至今日。同人等促其開會紀念。以彰既往。而策將來。觀感發抒。關係匪細。茲定於某月某日。在純陽街五號社室舉行。凡我同志。務希蒞

臨。或爲文字之激揚。或爲物質之贊助。意存策勵。力予扶持。諒不棄於賢豪。求更深之教益。爰修蕪啓。用代簡邀。竚盼榮施。毋任跂禱。

代江子立爾鴉致某當道書

某某先生賜鑒。昨得摳瞻。備承獎借。傾談側席。動念彈冠。浪迹江鄉。竄名醫籍。事非所願。用違其長。旣慚愧於家聲。更銷磨其壯志。憶自曩游西粵。兩綰縣符。無如風引神山。幾同泡幻。知遭時之不偶。乃挾術以自鳴。局促依人。光陰老我。幸逢伯樂。庶幾鞭策之加。倘錄微長。願得斧柯之假。百里敢言地小。雖瘠苦而何嫌。好官豈爲錢多。恐修名之不立。謹呈履歷。用備裁量。冒昧干陳。諸希諒恕。肅此代謁。敬叩勛綏。

致石埭縣長吳國楨雲峯書

國楨縣長政閣。客臘復上一函。諒邀籤譽。省志採訪一席。比得彤侯館長復函。

謂已函縣另舉。想經甄剡英賢。上供徵辟。究竟所舉何人。已否實行職事。至深跂念。弟入春嗽喘漸減。擬俟天氣融和。掙扎回里。躬聆教益。期當不遠。前聞敝邑有人。妄作蜀吠。曾由紳耆來函聲述公理。具見德澤感人。輿論自有真際。民廳友人。並言此種挾嫌攻訐行爲。當道洞察深惡。料無若何影響。昨敝族叔巨川來省。據言此來。正是訓飭次子。阻止控告。不料控呈已先兩日遞出。無從追回。只得勒令其子。脫離組合。即日歸里。敝族叔老成穩慎。向不肯越分多事。在五區辦理地方公事有年。公論翕服。其子少年輕率。受人愚弄。茲經乃翁詰責。亦已澈底悔悟。務求格外垂原。不與計較。台端政績循聲。昭人耳目。流言飛謗。何傷父母之賢。壤頌衢歌。自有公平之論。小人缺望。有爲而爲。大度包荒。見怪不怪。我公明達。當爲莞然。再五區胡區長遷移公所之舉。頗聞不滿地方人士之意。七里原爲五區適中地點。相安有年。公所不宜隨私人而流動。似以仍還

原處爲妥。崑此布陳。祇頌勛綏。

復舒雋城院長

萬傑書 癸酉處暑

雋城院長先生偉鑒。歸來抱病。箋謝未申。乃蒙金玉先頌。殷殷存問。高情雅意。感愧曷勝。迴憶臨川聚首。曾幾何時。鮑叔綈縞之歡。公瑾醇醪之醉。冰瓜雪藕。快沁心脾。揮扇挑鐙。商量書畫。凡所以養欲給求。憐才敬老者。無微不至。公原好客。我愧酬知。境過追思。彌增眷戀。安得機緣天假。再合萍蓬。後望無饜。顧景自笑。今夏之熱。酷而且久。執事與右禾作。何却暑之消遣。不知風簾竹榻間。仍有時話及衰朽否。弟目昏手顫。迄今未瘳。小兒近忽失館。生計恐慌。心緒惡劣。撫州政軍局面。近狀如何。舒現任軍政部第二後方醫院院長駐贛之撫州清暇惠書。不我遐棄。是幸。崑復鳴謝。敬頌勛綏。諸希愛諒。不盡。

致九江警備司令陳鳴夏書

雷書

鳴夏司令麾下。久慕盛名。未親偉範。前由舍親張達夫傳示屬書立軸。比因字徑太小。又值整裝遠游。匆匆寫成。未及細意經營。乃蒙獎餽百金。益增慙慙。勞輕酬重。心殊不安。亦惟義託不恭。覘顏領受。另聯尊撰二言。具見雅量。此閒（如皋）荒僻。筆墨紙無一是處。容竢旋皖。遵寫奉上。閩氛日惡。贛防自益喫緊。潯江衝要。賢勞可想。作中流之砥柱。庇腹地以干城。翹首旌麾。曷勝跂禱。弟客滯如皋。忽已逾月。再有兩旬勾留。定作歸計。今夏曾游臨川。明春或更作贛行。爾時道出柴桑。軍門投謁。楊柳青旗。壺歌饒吹。中許我掀髯長揖。抑亦雅緣快事也。肅肅申謝。敬頌勛綏。諸希垂譽不備。癸酉除夕如皋客次

陳劭吾家傳贊論

徐建生曰。綜君生平。大別可爲四端。曰折獄。曰理財。曰風節。曰慈善。折獄理財。名顯著矣。所謂風節者。亦卽埒見於折獄理財中。而尤以在黔之查滇督參案。

在蘇之與端督抗爭。在民初退休時爭撤蕪湖米捐鹽斤加價於軍閥專橫之下。爲一時清議所推許。蹇蹇諤諤。不撓不屈。方諸古先名宦達人。何多讓焉。迨觀其晚年篤學修善。植家訓子。則固藹然一老儒。嗟乎。用世之烈。雖千百倍。亦與世運俱逝。惟此里族留遺之澤。利賴之厚。則將歷世不朽。乃者鄉之人且議定私謚曰慈惠先生。其名之虛實久暫。不愈益皎然乎。

疆本堂彙編書後

劭吾姊丈宦甯時。我適在兩江督幕主軍牘。周慎愨調督兩粵。溲陽端午橋繼兩江任。先後三年。劭吾與午帥齟齬抗爭各節。多數爲我預聞親見之事。以爲其才幹風節。不愧我外祖虎臣公再傳之淵源。世變後。彼隱滬濱。我遷安慶。音問罕接。形迹益疏。今冬任邕如夫人（劭吾繼室）延我來如皋。爲其校理遺稿。得盡讀其所著述。始知劭吾一生。凡居官樹立。以及鄉里慈善義舉。固無往非

以經術飾吏治。本性理爲施濟。名爲名宦。實則純儒。嚮以才幹風節。目劭吾。誠淺之乎。測劭吾也。夫深交至戚。如建。其於劭吾生前。知之尙未能盡。而望當時之君王權貴諸人。能柄用之。使盡其才。固亦絕無僅有之數矣。編次坵書所感於末。

致二內弟袁鏡人函

甲戌中秋後十日

日昨令夫人錢氏來城。所述苦況。筆不勝紀。總之非人所能受而已。此婦頗知大義。忍苦耐勞。除貌外絕無不善之處。爲從者配。殊不玷辱。且相莊已十餘年。而忽欲去之。此中隱奧。非我所能揣測。豈內無美婦。不足爲戎馬書生。生色耶。抑裙帶中近多捷徑。將別有作用耶。聞堂上年來頗亟亟。另謀相攸。乃久無端倪。家鄉稍稍可觀之門戶。皆有提高女權之傾向。聞其人無故逐原配。誰肯以掌珠投薄倖之手。然則從者理想中之婚事。將來必須求諸較遠之異鄉。或仍

取材於花柳。鄂姬殷鑒。甯不寒心。萬一客地。朦訂高婚。如學界女氓。故家浪女。苟且戀愛。俯拾卽是。然而生活痛苦。家庭悲劇。潰癰噬臍。禍不旋踵。我所聞見。此類極多。錢氏自知甚明。決無抗拒納寵之意。藏嬌蓄美。舉止自可從容。況側貳關繫較輕。不幸有變。對於身家名譽上。不至重大損失。糟糠黃臉。琴瑟白頭。知者傳爲美談。自問尙無隱忒。所以爭人格。留陰德。感應果報。未必無憑。我爲借籌。莫善於此。如必逞其意氣。取快一時。錢氏自無一毫反對能力。旣難另嫁。惟有一死。清夜追維。良心判斷。此後畫眉歡樂之場。疚心悔懼之隱。恐終身無解釋甯淨日矣。不得已更思其次。或給以千數百金贍養費。君非置之死地。彼可勉保餘生。無辦法之辦法。事實差可敷衍。心地總不乾淨。重色二字。學人諱言。今雖時世不同。尙不能越出天理人情外也。我頭腦陳腐。雅不欲多言。惟念岳父在日。屬望之殷。與令姊憂思之切。錢氏之苦在眼前。從者之苦在畢世。種

種激刺。種種感觸。交攻於心。莫捫其舌。拙見所及。試再瀝晰言之。聽與不聽。效與不效。關係出入太大。我寫至此。已戰栗不忍更懸揣矣。此致鏡人二內弟亮警。

跋篆書金剛經

己亥仲夏

自金石峪後。負書名者。類以寫金剛經。表示儒生之善信。古今傳本。率多隸楷。而無小篆。溯白馬東來之日。正修明六法之時。既譯梵文。似宜篆字。建習篆四十年。不自揣量。輒思潤色受持。備具一格。十年前曾寫一通。持贈竺庵法師。保存。嗣讀說文。觸處發現所寫之謬誤。筆畫亦滯弱不振。竺庵亟欲影印。我力阻之。矢願爲之複寫。乃愈讀而愈覺學力不足。愈寫而愈覺筆力未充。瞻顧遲回。瞬又五載。邇來衰病日甚。汲汲不可更緩。爰於己亥上元後寫起。端午前完畢。計字五千餘。歷時四閱月。中間非甚病與客行。未嘗間輟。裝竟仍付竺庵藏之。

以此印行。或不至爲宣揚般若之玷。夫小篆必須依據說文。至說文未收之字。如薩住淚僧之類。謹照譯本書寫。未敢以形聲假借。致失尊經本意。他如蜜應作蠹。鉢應作益。袒應作但。耨應作耨。筏應作撥。怖應作捕。墮應作侈。億應作意等字。則悉遵依六法。惟譯名藏字。說文作臧。此字在佛經中有特別音義。且係地名佛號。故仍加草。惟一無字。就原有筆畫略參變動。亦猶詞朗崩秋。與意造不同。又篆書重文例作二。恐於字數有差。且亦非尊經所宜。故仍重寫。或謂漢以來篆碑。及李監夢英之千文。不合六法之字。指不勝屈。藝而兼學。古無其人。子何斷斷爲是。亦一說。然非我所敢執也。生當段朱諸賢之後。決不容再有自我作古之膽妄矣。我惟竭我之誠。盡我之力。是與不是。傳與不傳。聽之天下後世。

陳邕如夫人任太君五十壽言

民國紀元二十有四年夏歷乙亥十月朔日。爲清封一品夫人邕如陳姊夫人任太君五十壽辰。族黨戚友先期疊爲稱觴之請。太君堅却之。執辭旣嚴。意誼尤摯。請者遂逡巡焉。建數十年來。操筆爲詩文壽人者。歲不勝計。而獨於太君之壺範懿行。竟闕然無一言。將何以自解耶。乃就我所諳知。與我所當言者。撮叙概略。與臺萊甫柏之專事頌祝者迥異。或無悖其謙抑之本懷歟。太君系出四川彭水任氏。父諱裔科。老儒而精星數學。別無子女。鍾愛至切。家本寒素。迭遭荒亂。遷避轉徙無甯所。裔科公病歿旅次。孀孤束手。太君年甫十一。自願鬻身殯父活母。時適我姊丈陳劭吾公挈眷赴開州牧任。驛路相值。奇其志。劉夫人尤器重。亟資助之。俾畢厥事。携至任所。不使與婢僕伍。漸令入塾試讀。日數行下。日卒古文一首。出筆亦斐然。劉夫人多育子女。中年衰病。日常銀錢出入。米鹽料量。衣飾製備。一切家庭鉅細。以及小兒女提携調護之事。一惟太君是

賴。曲折周詳。靡不當意。年十八立爲副室。當劉夫人病歿。第六子汝閔年最穉。太君撫字教養。劬勞逾於所生。自劭公改官江南。兩總釐金。歷任督銷鹽棧。監理湖南財政。門庭日益擴張。內政日益繁重。太君處之。輕重緩急。各適其宜。劭公軫念勞瘁。徇諸子之請。於其三十生日。具禮冊正。族戚翕然無異言。人第見其履順致祥。詫爲盛福。而不知其所經歷之艱苦棘促。每有十百倍於常人者。劭公胞弟四人。劉夫人六子三女。意趣各殊。情感互異。縱有精誠奇巧。詎能因應胥孚。又或成見紛歧。誤會偏激。推演滋蔓。在在可憂。自非絕大智慧。過人氣量。安能涵濡融洽。如是其清明哉。諸子中長汝熙。次汝宣。四汝謐。五汝炘。均與其父先後相繼歿。身歷諸喪。憂勤交瘁。三子汝湜。宦成最早。敏幹傑出。其事太君尤恭謹。稟承規畫。方恃以振式門庭。不圖事與願違。壯歲殞折。此亦太君近年最痛心之事。少子汝閔。學成後略涉世途。卽幡然厭棄名利。抗心文字。一以

承歡養志爲樂。洵不負太君鞠育期待之意。天所以報慰賢母。而張大邵公之德業者。其在斯乎。其在斯乎。太君性嚴肅。喜怒不遽見辭色。居常履動。皆有節度。自奉極儉約。而義所當用。則慨然不稍吝惜。劭公生前創建石埭永濟橋。捐置陳氏固本義莊。設立石埭體仁堂。以及興學振窮各善舉。耗資鉅萬。鄉人經理未盡善。復值歲歉。兵災支應。恆苦不給。太君繼續補助。扶掖之。至今不懈。其寄居如皋。對於地方公益。無不竭力玉成。捐資助以萬千計。今春又特撥慈濟會田六百畝。育德所田百五十畝。國府省府。褒題匾額。重疊頒贈。至其平時睦婣任卹。振惠貧乏。恩誼被於個人者。更指不勝屈。好善之篤。嗇於己而厚於人。是尤常情所難能者。建同母止一姊。字劭公未嫁而夭。世交戚好。彼官我慕。轍轍每不相及。太君之懿福盛名。初亦得諸傳說而已。癸酉冬。太君以編次劭公遺稿見召。館其寓齋數月。談論敘述之入吾耳。履動行止之接吾目。益令我驚

服詫慕而竊歎。昨聞之不如今見。傳言之不逮事實也。其處家好善。已如上述。至其才識。尤屬天授。蕪湖原有廣裕萃裕兩茶號。如皋繼設宏裕茶莊。權量出入。鈎稽贏絀。日計月要。纖悉皆有成算。諸肆用人逾百。各舉其職。毋或敢欺。其功過旌勸。稱情平施。人亦樂爲之用。而不忍欺。歷年兼營如皋金融電汽事業。凡公司股東有事會議。多數須於太君取決焉。以是求之鬚眉精幹中。且罕倫比。況巾幗乎。吾先姊無論矣。即使劉夫人當之。成功收效。恐亦未必能爾。噫嘻。至矣。建愧不文。而於太君顯著之行誼。經過之艱鉅。恆思有所紀錄。今逢令辰。謂能已於言乎。至於頌揚諛美之詞。既非太君所屑受。亦非建所肯爲也。書竟寄付汝閔。爲我張之綵堂。以就質於族戚友好中之知太君者。

當塗均賦亭碑記

乙亥冬

當塗田畝。數千年來無正確丈數。以故益者愈益。損者愈損。溢漏侵隱。賦入日

減。劉一公縣長來治我邦。鑒於苦樂之不均。大爲民治根本之障礙。乃積極舉辦土地陳報。以期澈底清釐。經始之初。強者駭懼。弱者疑惴。沮撓觀望。衆情沸騰。劉侯毅力精心。直前邁進。宣揚陳報之意義。訓練陳報之手續。繪成坵圖。責重保甲。履地問戶。按戶問糧。併百計以圖成。歷萬難而勿阻。卒以半年之力。竟完具體之功。雖部省皆派員指導。而劉侯實主持重心。定案後計溢增熟征田地二十九萬餘畝。減輕田賦附加百分之四十八。少弱而省縣雙方稅收。反可歲贏十一萬元有奇。駭懼者釋然慰洽。疑惴者踴躍歡騰。省府爲之晉級加俸。財部爲之專刊表揚。而萬世福利。首被吾民。偉績先聲。楷模全國。感戴欣幸之餘。僉議築亭紀念。劉侯名其亭曰均賦。蓋取至聖無貧無寡之旨。意至深也。參預此舉勤勞最著者。爲某某諸君。亭成勒石紀事於此。

全縣紳耆民衆公立
建篆書張國華篆額

坳存 文類

繡帕序

馮星槎侍御公子次槎眷燕妓素卿搗間尼之迫嫁某富賈素以自繡帕贈別馮索余序

才人矯矯。幽蘭沅水之香。公子翩翩。大樹澠池之望。越江海。謁裘而至。入國觀光。好韶華。擲錦而來。逢場作戲。拜倒梨園子弟。小拏一朵紅雲。攀來桂府嫦娥。香透九霄皓月。而乃矚目。竟懸高格。相皮每笑庸流。謂天下多美婦人。況鍾情正在我輩。遂心猿而意馬。更帶蝶而尤蜂。恁地溫柔。未肯此鄉終老。隔牆佳麗。幾於我見。猶憐。則有素素齊名。卿卿爭喚。婀娜比臨風楊柳。輕盈欺出水芙蓉。繡幄私窺。驚道五百年冤孽。玉臺新下。爭酬十萬貫纏頭。從今一縷游絲。牢牢拴住。拚把三生情債。件件還他。酒綠燈紅。裙屐壓五陵年少。馬龍車水。鞭絲傾十里平康。劉郎中醉倒筵前。渾同閒事。馮公子照春屏底。真箇消魂。朝朝舞扇。

歌衫穩住清涼世界。忽忽賓鴻客燕。暗催美滿光陰。詎知好事多磨。驟覺歡娛
易盡。千金贖玉。深心人未敢明言。一斛量珠。碩腹子竟爭先得。時則中天滿月。
暢好清秋。驀地罡風。驚回短夢。楊花撲面。空憐鄭史瓊枝。桃葉傷心。莫唱戎郎
藤蔓。促過牆而鶯泣。蜂蝶頻喧。聽載道之驪歌。鴛鴦兩背。行遲遲而迴首。語默
默以沾膺。探袖淒然。贈紅綃於裴質。分襟近矣。慘朱帕於盧仝。好教覩物思人。
念是阿儂手繡。祇此絲長縷短。稍償若箇情癡。珠露千行。看前夕淚痕猶在。羅
雲一幅。儻他年魂夢相逢。兩字酸心。語郎珍重。一聲揮手。望影淒迷。此別奈何。
慳杜牧揚州之夢。我聞如是。續樂天阿輓之詞。嗟乎碧海尋春。風偏誤引。黃金
買笑。月不常圓。僕本恨人。紅豆拋殘。燕市君尤情累。青樓豔說。鴻泥由來打鴨。
驚鴛。不使因緣竟合。明是家鷄野鶩。奈何魔障還招。況乎季子頽唐。衣裘易敝。
文園清渴。鉛汞徒傷。鯉庭篤守青氈。豈許椒花添寵。鴻案新盟白首。那容樛木

分春種種違心。鯁鯁過慮。大好之才華可惜。無窮之煩惱何堪。不如投袂歡場。珍留薌澤。莫更買絲廣陌。浪繡花名。

右爲四十年前（己亥春明幕次）舊作。氣韻纖滑。尤欠洗鍊。其平穩處亦考試尺牘濫觴。去詞章遠甚。惟我生平頗少駢儷之作。散佚中只此稿尙成篇段。爰錄存備一格。殊不足當敝帚意也。

遲廬雜存

詩詞類

石埭徐建生箸

讀李眉盦太守王孝起太史唱和律句有感卽次其韻

庚申秋

劫餘歲月幾何年。爾我相看一惘然。糟粕生涯惟縱酒。瓊瑤供養不名錢。蜩羹鼎沸人間世。蛙鼓雷鳴井底天。薇蕨榛苓自千古。名山辛苦莫爭傳。

疊前韻

眉庵治六期年來書述清苦疊此報之

琴鶴蕭閒又幾年。白雲出岫豈期然。使臣煎迫催官欠。廉吏逡巡愧俸錢。應有桑鳩鳴綠野。頗聞竹馬迓青天。風流太守斯民福。時論稱爲風流太守難得清名到處傳。

李範之道尹王仲薌處長有詩餞歲感次其韻

此生潦草勞塵裏。世事滄桑變態中。泡幻升騰蠅坭驥。藩籬局促鷄啞鴻。陽春

有脚疑青帝。造化無靈問碧翁。但借長風九萬里。搏雲甯埃羽毛豐。
鬚眉負我倏頭童。又見桃符換舊紅。鐵硯未忘文戰北。銅琶猶唱大江東。滿城
笳鼓催元日。列隊冠裳拜下風。喜有高軒傳雅什。扶輪吾道詎終窮。壬戌上元

秋日登大觀亭

蕭瑟秋風幾度經。萬方多難此登臨。八公煙雨連三楚。百戰滄桑賸一亭。帆影
遠隨波上下。角聲高咽雁伶仃。老臣甯守孤忠墓。碧血蒼髯腐草青。

陳仁甫新築落成招飲

丙寅冬

三弓地占四時春。清福由來屬雅人。兩字功名成例劫。十年哀樂付勞塵。門無
車馬何嫌小。室有琴書未算貧。極目江濤拍天起。醉歌莫問武陵津。

哭十女璞汝

丁卯重九又九日

乍從死後溯生初。十七年來一夢餘。

女歿於七月杪。日今日九月十八。是其生日。適屆七滿。家人益痛之。

莫訝曇華疑福

慧人天色相本來虛

不櫛清名傲古人。蠹魚曾化女兒身。今生識字真多事。斷墨零牋刺眼陳。
不將因果說空桑。侍母清齋夜炷香。菩薩生辰兒死日。旛幢端合往西方。
詠絮才華問字年。依依硯席劇兄憐。藝林說苑題名徧。更待增修列女篇。

尤切亟亟輯其遺稿及小傳付新
申各報及小說世界等雜誌登載

實兒
悼妹

遠書痛妹慰親心。嗚咽陳詞意倍深。往事今皆成悔恨。倦妝慵繡苦相箴。

八女
張氏

由雙林來函勸慰且深悔
歷年對妹督責訓誡之苛

不聞携妹喚鶯雛。哭拜靈帷待母扶。一語刺心增痛淚。阿來有姊我甯無。

彌女
甫二

齡知哭其姊聞二外孫女來兒喚姊。
泣語其母曰我姊死我沒得喊了

鴛牒盟成鳳卜遲。捷書訃告兩相疑。高才大蠹臨江日。正是鶯啼夢斷時。

國死驚烽來去天。掀地沸中菊蕊離披桂華冷。白門秋雨皖江風。

生成孝友性偏多。才德無年奈若何。塵網未撻先解脫。爲誰歷劫到娑婆。

我生女

除襁褓殤折外尙七
人今已亡其四矣

再哭璞汝

仙佛不稱壽。聲香總劫灰。瓊枝天上種。何事入塵來。
水清容易涸。花好會先殘。覆掌明珠碎。輸他瑇瑁環。
鶴和鸞翔下。琳琅護鳳雛。羽毛漸憔悴。泣露戀高梧。
樹老留餘蔭。三生借一枝。朝來憐病鵲。嗚咽唱將離。
生比男兒慧。簪花寫蠹魚。殘鐙照華簀。手顫不拋書。

歿前數小時尙索書
報腫昏手顫不肯釋

諳切兒能慰。嬌雛笑語愁。眼前兄妹意。念爾更何堪。

一榻餘煙裊。孤鐙夜漸寒。鶉啼斜月裏。杯土怯荒庵。

其柩寄厝東
郊菩提庵

衣履巾箱在。釵環鏡匣塵。紙模焚不化。誰與辨時新。
夢見何曾死。宵來夢更悲。癡心與痛淚。無語幻成詩。
衰病殘秋迫。何堪老淚紛。泉臺如可待。應爲理琴尊。

附亡女璞汝絕命詩

歸飛鶴喚乳烏啼。戀戀庭闈更幾時。一病膏肓前世劫。十年心跡老親知。肺
肝欲裂言猶諱。慈愛方深忍遽離。兒命難延兒罪重。承歡可有再生期。

陳烈婦何荊葆

何植初君錄其胞妹荊葆投水殉夫事略徵題作此應之

古井沈埋明月缺。三千年來無數劫。一夜海風吹血腥。地祇震盪坤維絕。良母
賢妻世所排。女權橫決社交開。破除廉恥競神聖。鄙夷節孝嗤童駮。何子示我
書一紙。一讀再讀淚不止。代筭磨斷智井投。胡爲今日乃有此。或言事在兩年

前以今相擬。尙天淵。不知奇烈屬根性。時流萬變情不遷。骨肉身心且捐棄。何
有人言與名利。假令烈婦當今茲。知亦一瞑無他計。青山何氏世居青山自昔淑氣鍾。
鬢髮荆布多女宗。外循溫婉內英毅。斯人取義何從容。扶病結襁血漓沓。呼天
籲代不得請。倉皇飲鳩藥力微。嚴裏重綿暑汗冷。靈幃潛訣影模糊。出門猶聽
孀姑呼。別鵠哀啼夜月落。鮫人淚盡清波枯。奮身直入河水底。衣濡容斂泥不
滓。千秋凜冽氣如生。兩月堅持心早死。噫吁嘻。官家議廢清節堂。學子議仆貞
烈坊。喬妝禿鬢訂城闕。禮教幾希那不亡。噫吁嘻。榛莽連天翳松柏。炎霾散沓
冷冰霜。表彰不塞兄心痛。振式將爲女道防。

陳一甫惟壬姻仁兄六十壽辰

次其述懷韻

彤雲甲錄護吟牋。海北天南斗柄旋。桑孔多才家國重。郊祁延譽梟昆賢。飽經
憂患收清福。憂患清福皆述懷詩中白道語倦逐功名企大年。歇浦勝游成隔世。一鞭塵起讓君

先。庚子劫前一甫主開平煤礦滬局會計我司總局文牘
南北往還平原歡洽彈指卅餘年忽忽雲泥不堪回首

揚亮功陶寰中俞子慎鄧季宣四公招飲卽席次姚仲實韻誌

謝己巳新臘八

風雪漫天作勝游。停杯四顧話千頭。劫關全局棋難定。寒到中天水不流。磨蠍
有時偏嚇鼠。縛雞無力敢爭牛。明公雅有醇醪意。許我當筵借一籌。

網球歌

己巳冬安大舉行網球比賽我賦此篆書小軸充獎品

游於藝者好身手。技進乎道十八九。擊球打球古所有。毬以網名喧衆口。兵刑
書數學有餘。呼儔挈侶筋骨舒。十步百步比射彀。一馬二馬方投壺。一人手一
拍。兩人遠應接。界畫以內。紛縱橫。騰空飛控各有節。星流電激砍且抽。門格輾
轉不肯收。公孫劍器波瀾洞。宜僚弄丸風颺颺。幾盪幾決戰終勝。掌聲震耳如
噉應。出奇入妙鬼神通。馭氣沈機巧力并。遠東雄霸推邱林。倘然敵對孰逡巡。

皖滬間一衣帶水。千里應傳笳鼓聲。

燕京感事

洪憲時作

柴家老婦趙孤兒。人力天工妙轉移。龍德能潛蛇脫蛻。虎威不振馬蒙皮。言和言戰皆家醜。傳子傳賢總帝私。長樂文章工勸進。攀髯坳翼兩迷離。鬻割哀鴻豢爛羊。擁旄執戟盡侯王。終年風雨天眞醉。帝子胚胎國竟殤。簡冊新編王氏臘。冕旒雜襲漢宮妝。黨誅血被長安市。椎七從容肘腋旁。

奇香行

甲子年作龍江客次

君不見。金粉湖山夕照紅。塵埃滿地胭脂空。又不見。颯颯西風戰秋菊。黃散金英白碎玉。甬東女兒名奇香。家世陵夷越中王。慧質嬌姿應劫出。苧蘿春色難深藏。明珠奪出慈母掌。阿爺携之走金閭。鬻身活親兒不恤。枳棘從此棲鸞凰。十齡盤髻學歌舞。名屬教坊第一部。不教粉墨擅氍毹。只許箏琶咽金縷。江海

春深豔幟高。明駝載恨入燕遼。細蕊攢盤盈百琲。流波漾錦集千條。五陵裘馬
恩情重。嚙臂私盟生死共。鸚武多言。鷓鴣怒呼。可憐驚破鴛鴦夢。瘦骨稜皴。病力
微。風號雪擁促南歸。脂凝剪口。膚痕亂。淚浣鉞頭血點飛。飲鳩一盃不得死。魔
長劫短無休止。黃鶯撲翅出樊籠。繫足絲繚飛不起。憶從祖道去鳩茲。翠鬢珠
喉繫我思。正欲江頭問摩勒。重逢又是暮秋時。牽幃錯愕不知語。握手相看淚
如雨。淒折歌停強笑遲。七年憔悴從君訴。東籬扶醉擷殘英。拚把新愁浣舊痕。
百和濃添魂欲碎。雙星緩度夢難溫。枯盡秋波明鏡掩。鬢絲歷亂渦紋淺。西樓
夜夜伴添香。膩枕熏裳親檢點。凱歌催促勸離觴。嗚咽江流引恨長。十日纏緜
三疊曲。一聲珍重九迴腸。年來我亦頽唐甚。多少冤牽與卿等。紅顏黯澹盛名
衰。白髮蕭騷熱腸冷。而今嗔愛已成癡。又續相思問後期。灘里量珠驚短夢。桂
宮擲笛唱新詞。噫吁嘻。桃根隨浪轉。柳絮任風披。緣與孽。總迷離。離與合。更難

知肯把黃金買紅豆。莫教碧玉誤緇衣。美人身世才人淚。地老天荒何所之。

雲卿

卽張金紅金陵人甲子冬蚌山客次作

漫天風雨秣陵秋。無數瓊英逐逝流。織素年華珠墮掌。傾城身價錦纏頭。生多媚骨宜淪劫。果有情腸會殉愁。望斷錢唐江上路。強含涕淚看阿侯。曉風撲翅待高飛。雲漢崎嶇氣力微。簾底鸚呼名未改。鏡中鴛並夢全非。蓬局試樹新題幟。蓋篋重翻舊舞衣。莫向東皇問消息。百花香處卽春歸。烏衣公子褐裘來。幾日江頭醉醒回。萬種相思收艷福。三生緣分解憐才。昭陽夜語金鈿合。浥露朝吟玉鏡臺。難得深情慰白髮。援餐分酌紫霞杯。

徐桐隱挈雲
賃居蚌市數

數招我參預歡讌慰
我旅寂滋可感也

自傷身世更傷時。絕頂聰明絕俗姿。隨意慵妝無礙雅。泥郎絮語不嫌癡。六朝金粉長千里。一曲琵琶太傅詩。眼底多情宜眷屬。莫將風月說輕離。

追悼甯資愚

調寄金縷曲 己未代星作

天靳才人壽。古今來夏霜春雪。傷心十九。世局紛騰無終極。多少白雲蒼狗。正展驥搏鵬時候。一詔先秋催雁去。更聯翩玉樹。罡風驟。時與數。那能究。南州棠舍汾河柳。試使君鳴琴雅調。和羹高手。聚起丹鉛洪鑪火。鎔鑄陰陽新舊。要彌補乾坤罅漏。惠在鄉閭功在國。算英名幾倍年長久。揮涕問。汝知否。

以上八首自燕京感事起。係從殘紙中檢出補錄者。

金慰農處長

猷澍第四次觴詠集見招卽席賦謝

使君意氣出風塵。拂拭高軒集雅人。

金時任安慶
市政處處長

四壁琳瑯詩卷富。一盤苜蓿酒

杯新。風雲變幻天如故。花草惺忪歲又春。我亦疎狂能作態。不辭衰醜效眉顰。

慰農築新月軒徵題

不許江城春色減。軒亭點綴自天然。多留窗口光三面。照澈簷牙影半園。廷誥

碑陰安酒盞。

亭倚清
御碑後

市喧聲裏擘吟牋。明公雅有扶輪意。觴詠從容集衆賢。

贈劉翊軒

凌雲堂筆墨店主

寥落江城親故少。相看爾我雪盈髭。宦游久覺塵勞倦。歲暮無如市隱宜。半畝階庭三徑闢。兩人心迹一鐙知。羨君黃髮歌偕老。膝繞斑衣手弄飴。

和金慰農菱湖讌集賞菊四律

用原韻

僅存荒徑原應瘦。分作秋容不帶嬌。景物安排關造化。榮枯消息問參寥。品題甲乙眉能列。護惜根芽手自澆。高會似聞重九後。新詩傳誦到元宵。不隨松竹競稱材。彭澤閒情酒一杯。潤色無須多雨露。先秋經過幾風雷。香從瓦缶消磨盡。種是瑤臺謫降來。折取一枝商寄託。東籬冷落莫輕栽。江上芙蓉待借枝。雨餘又值肅霜時。箇中有節天生晚。此後無花世豈知。高士黃金衣袖滿。美人翠縷枕囊宜。孤芳未解隨緣意。却病延年繫我思。

劫餘歲月幾何年。回首前塵一惘然。鵲華尊疊容嘯傲。龍山冠佩憶清妍。空餘楊柳迎秋舞。無復葡萄向日鮮。歸去餐英不成醉。柴桑羞澀杖頭錢。

慰農出示上年觴詠社四秋詩詞各稿適有所感爲各賦蝶戀花一折

秋荷

寒雨吹晴湖水退。翠蓋珠盤多數風前碎。碧不成筒難買醉。雲裳去後遺殘佩。零落疎莖還點綴。不見鴛鴦鷗鷺閒相對。冷剝蓮心嗔小妹。六郎病起添憔悴。

秋桐

殿閣蕭森庭院曉。落葉聲中頗訝西風早。往日曾經棲鳳鳥。一竿青立斜陽表。爨下何嫌知己少。便作青琴尾亦焦難療。來歲濃陰依舊好。枝柯不讓松杉老。

秋葭

紫蓼蒼蒹洲渚側。管動飛灰待汝占時節。倚玉聯瓊何易得。溯回爲惜伊人別。

禹識天冬由彼茁。霜信來時搖曳頭先白。蘆荻參差渾一色。飛花點作清波雪。

秋楓

老幹生香青作彩。浥露凝霜顏色隨時改。好爲停車供坐愛。斜陽一片珊瑚海。舊夢吳江煙樹外。冷對愁眠漁火依然在。爨杖靈脂都化解。漢宮秋色爭眉黛。

示三弟泰雲

庚午上巳殷家匯清理瑞積昌時感賦

杜鵑聲裏話連枝。淚滿巾裾酒滿卮。歷劫滄桑餘骨肉。傳家冠佩惜鬚眉。盈虛慣例渾如戲。躑躅窮途到處歧。難得階前春未晚。蘭芽竹筍好扶持。

有感

蒼茫南北復西東。幾許煙雲幾雨風。政治新猷王霸外。飢寒殘喘亂離中。國聯公約爭非戰。軍縮強權倡領空。待挽銀河洗戈甲。海天秋訊問征鴻。

王撫五

星拱

校長以長句報贈篆聯依韻答之

辛未夏

壇坵尊榮幣帛輕。右軍風節伯安名。主賓半載不識面。書城新舊分都京。博通今古撫金石。丹鉛墨寶皆有成。我書無法恥依傍。卅年煅鍊枯枝撐。泰湮繹僞渺斯相。凝冰敢與襲晶瑩。雷門浩浩容布鼓。珠璣不吝報瑤瓊。名山自昔鮮真實。疑亂都緣名利生。鴉塗果不負期許。各有千秋誰與爭。王現任武漢大學校長

胡淵如過我暢談感賦一律

壬申上元後三日

賞心一笑早春晴。爾室千秋志竟成。白馬文章探祕鑰。青牛道德洩元精。天人參透知無我。貧病交煎會有名。且盼東風先解凍。江流如鏡海波平。

血兒傳尾聲

血兒傳爲閒話集中小說之一

龍蛇水火劫縱橫。一劍難當萬不平。從古玄機科學化。自然清氣道修成。人禽界別同真性。仙佛神奇亦至情。世外高談天外想。血生土育太元精。

血兒傳編成有感

浮生歷劫總成空。筆墨爭如造化工。野有稗官供史料。世無游俠負文雄。電光泡影身經後。西極東荒理想中。似海思潮盈掬淚。名山一例付泥鴻。

挽胡淵如

遠濬孝廉近歲主講中央大學哲學

舊學日以晦。篤學愈以稀。安定又輟講。我爲國學悲。識君二十載。久要相與期。同歲三月長。抗行當肩隨。文字我益友。學行我取師。聖賢大本立。道釋養生資。著述必精當。理解入妙微。孝恭根天性。樸質見古遺。渾然元始氣。謂可臻期頤。乃以教養責。遂奪藏息機。玄督失靜守。講演腦力疲。一蹶不復振。杳然飲上池。鐘阜雲黯澹。江渚歸靈旗。客春恣吟賞。今春歌露晞。方溪劉海閒。斯文誰繼茲。太息撫遺卷。人琴終古思。

贈陳百邨

調寄金縷曲

百村現任十八軍秘書長癸酉夏贛西撫州客次作

泥絮因風起。乍來尋臨川勝蹟。墨池故址。千載琵琶成絕唱。無復賞音知己。訝

邂逅太邱仲子。鞀鼓聲稀。刁斗靜。夜挑鐙抵掌談經史。唾壺碎。月華洗。風裁峻上鬚眉紫。不願道萬言露布。三軍戰事。融會鞞鈴歸禮樂。旁及軼文奇字。要根本轉移治理。熱血婆心相激盪。盼使君早展凌雲志。麒麟閣。屬儒士。癸酉夏于贛西撫州客次

袁鏡人二內弟脫險賦此勗之

斷魂碎膽淚縱橫。握手相看喜且驚。病骨支離醒後夢。纍囚歌嘯劫餘生。曾經萬險隨機解。自信三年執法平。拭目前途好珍重。莫矜才調莫爭名。

陳一甫昆季爲其先人序賓先生百歲冥壽徵題 徐達生

人事異今昔。令名無生死。於鑠潁川公。百年增仰止。展卷文足徵。披圖事如指。五六十年前。知聞憶童子。我母公呼妹。我父視若弟。相呼冠乳名。交深總角始。同時戎馬閒。公獨蛟鳳起。綰權贛萍濱。危言騰薏苡。休戚關姻好。論救容有恃。

揖客叩軍門。飛符急電駛。健翮脫樊籠。高舉益萬里。軍勞與政聲。實錄著青史。衆曰鄉之賢。馨香百世祀。功多蔭逾遠。堂構森杞梓。小子蒙薄祚。孤露早無似。愧乏昌黎才。兒時私可紀。感觸明發懷。望風滋雪涕。

題朱讓泉廉潔盦詩冊

調寄賀新涼

頽仰今何世。有多少。經映史。昨隨風掃地。往日吟鞭聯。潁水唱和鼓。擊聲裏。是蓮幕雅人深致。十載滄桑。翻劫局。演蛇神。牛鬼無窮技。吾倦矣。君早逝。奚囊散漫楹書祕。有賢郎闡揚徵集。零賤賸紙。千里郵筒詩一卷。熠燿耆英題字。穀身後傳名料理。夏玉鏗金。須定價。莫懸瓊。輕入胡兒市。怕眩詫。夜光紫。

如皋公園訪水繪遺蹟

癸酉冬

霜風吹送過江來。禾黍荒寒倦眼開。一曲清流妝閣底。幾叢殘菊古城隈。美人名士紛疑獄。喬木觚稜共劫灰。我亦迦陵湖海意。有誰更拍紫雲迴。

題歷史感應統紀 調寄金縷曲

咄咄今何世。廿年來狂飆毒燄。混茫無際。禮教倫常皆桎梏。不惜衣冠毀棄。還說甚神天靈異。維圻綱頹翻史局。更干戈造劫如兒戲。止湯沸待安計。鄴侯悲憫思宏濟。借佛門文昌藍本。殃祥彙記。梨棗精刊箋注審。書爲丹徒李耆卿廳長出資棗板精刊工料勝百倍。孽鏡發揚光氣。任魔魅也應驚悸。一樣形骸同食息。有良心豈果眞無忌。持此卷破蒙蔽。

王仁山

樹榮

贈詩及聯次韻報之王現任安徽高法院首席檢察官

世運厄吾徒。甯無樂可圖。浮生疣贅耳。託迹酒人乎。縱論神何王。長吟興不孤。還將平恕意。花落詠騶虞。

徐友梅

世光

逝世三週紀念其子一達來函徵詩爲賦二律

報之

甲戌春

鶴唳江天舊夢驚。千秋義重百年輕。西山薇蕨歸安適。東海波濤話不平。濁世

完人元氣復。清修化劫道功成。堅貞慈惠榮華袞。無待廷僚議易名。公亦紅字道院信徒功

行最著會
謚貞惠

不堪回首重悲哀。卅載衣冠付草萊。魯幕連驂看露布。津橋聽鷓挹風裁。山河
破碎尊前淚。生死交情劫後灰。爲感人亡邦國瘁。援琴吟寫有餘哀。

光緒末。我與友梅同主魯撫軍幕。因誤會與楊蓮帥不合。亟亟求去。友梅
挽勸敦切。意至可感。洪憲時過津晤話。其傷時憤激。尤見風節。

大通李仁和旅舍遇陳西甫

惟庚 甲戌二月廿五日

風雨萍蓬二十年。相逢旅次亦奇緣。衣冠如舊鬚眉改。去住匆匆意惘然。

柏家橋旅店遇陳一甫

惟壬 甲戌二月廿七日

行途忽相值。握手各欣然。老健看鬚鬢。休閒問食眠。祇餘山水癖。難得子孫賢。

珍重臨歧意。重逢會有緣。

夏村信宿蘇緯之齋中感賦卽贈

甲戌二月杪

海棠零落杜鵑開。白髮緇衣冒雨來。大好家居山作障。多情絮語酒盈杯。詞章無用慙薪火。金石堪徵剔蘚苔。風景不殊春色減。鷓鴣聲裏重徘徊。

贈靜雲弟

定有

山川阻絕夢魂通。卅載蹉跎爾我同。嘔盡文心徒益病。殘餘華髮各成翁。滄桑家國興衰感。牛馬兒孫尺寸功。珍重夕陽無限好。且將老健傲春風。

贈滌雲姪

長青

三十餘年別。相逢應盡歡。絮談情繾綣。把酒淚洑瀾。我已饑寒老。君猶似續艱。殘春腰脚健。身外任天慳。

暑旱行

甲戌五月至七月不雨

五月望前一小雨。恰如膏油洒田土。赤輪炎灼五十日。日甚一日火烈舉。室中几席炙手熱。揮扇不停汗被股。飲食睡眠百都廢。伏坐籠甑劇蒸煮。赤地千里草澤枯。遑向田間問禾黍。一家十口旬不食。迫而自殺飲砒。呼號祈禱渺不應。天聽天視竟聳聳。偶爾青空來片雲。炎風吹散作絲縷。膚燂氣促血欲沸。表度高至百有五。至今天無悔禍意。秋風信斷將處暑。吁嗟乎。水火旱潦亦尋常。如何併合駭今古。遺黎早已殘喘迫。甯難蘇息索殲聚。百齡老人述所經。天災人禍歷歷數。天人感應詎無憑。我生未有今痛苦。吁嗟乎。酷熱奇旱造慘劫。後此劫數更幾許。宇宙混茫生氣盡。救災挽劫計安取。我爲蒼穹滋歎息。人類滅絕孰戴汝。

示實兒

兒充徽中附小研究部主任來書頗述客苦以此勗之

乙亥重九

戀巢雛鳳怯高鸞。雲海松濤試羽翰。

校舍在黃山麓之萬安鎮

勤作家書知客苦。乍經世態覺

交難。丈夫自有飛騰志。事業基於曠達觀。況是舟車千里近。往還竹報日平安。
讀白香山長恨歌有感

湖海樓集十二卷。七絕小注。載清初張文潛以五百金購白居易詩稿墨本。見其竄改塗乙。幾不存原底一字。云云。此說信否不可知。惟於白似太不合耳。

翠翹金雀玉搔頭。信物如何一半留。委地釵鈿殘缺後。有人早向馬嵬收。
寢殿傳聞每闢言。白頭閒坐話開元。長生詞誓尋常甚。應有宮娥耳屬垣。
文士難忘寒儉習。苦心塗乙亦何常。可憐鐘鼓深宮裏。挑盡殘鐙太上皇。

初十夜望月

丁丑仲冬大龍灣塘灣王宅

日未西沉月已中。半輪追逐麗晴空。相遲五夜還圓滿。可許從容詠玉宮。

贈王新一

王任某軍參謀主任率軍參加甯戰退休六安得假旋鄉即日仍赴軍次

鼓聲裏酒盈卮。又整征鞍惜別離。禍福懜懜心不懾。山河破碎氣能支。刀頭
彈角多功德。鐵血鋼腸見道慈。風雪漫天春意動。錦衣佇卜凱旋期。

坳存 詩詞類

思歸謠

戊戌冬北京路礦總局幕次

愁無緒。心無主。眼中淚。夢中語。怎件件般般。重重疊疊。絲絲縷縷。纏繞得竟沒
箇生人趣。算天生另外添汝聰明。便另外添些愁慮。家萬里。人三處。淮北風煙。
江南春雨。江水淮水。看朝朝總流到海邊來。向游子這一寸心頭灌注。分明
歸計橫相阻。夜來家書細訴。念吾父。幾回 **擗** 筆。哽咽不能舉。赤手當年。白頭今
日。此中何限淒楚。風雪辭家勞未已。還忍說兒今客苦。人生富貴命也。問古
今十全美滿。幾人可數。最難得韶華如許。愛日慈暉春駐。更有弟相憐。眼前姊
姊妹。膝下男男女女。骨肉纏綿。百年廝守。便饑寒不較分離愈。儘誇才華倚
馬。萬言露布。到頭來壓殘金綫。顯揚何補。汝負人。人負汝。由來熱血空塵土。萬

惡無如人道甚。百端慣被文名誤。歸裝檢點。行期分付。去去。莫驚起林中杜宇。病骨好支撐。健憶來時路。

懺春愁

戊戌春明幕次爲月仙作

乾坤如泡影。人世百年一瞬。有限光陰。幾多情性。問蒼蒼何苦把箇中人。直恁地百般蹂躪。紅顏命薄由來定。這人間小謫。青樓紅粉。算折磨已不止十分盡。怎教他愁外添愁。恨中加恨。名花早是悲落溷。更淒風苦雨相侵。無倒斷曉夜摧殘一恁。我忒癡情。判年京洛塵如夢。榴紅一面心先印。怪他眉梢眼角。幽神獨另。知有閒愁萬頃。那添得儂悲憤。笙歌鄰院。呎尺天涯近。便相逢未敢輕相認。絲牽縷絆終難禁。記取舊時芳徑。索把這一片心懷安頓。今日箇妝臺拜倒菱花鏡。爲何枕邊襟上。新舊淚痕併。捧心無力。低鬢悶損。知的是愁兼病。難爲語。還相問。問卿卿因甚。累他幾回凝睇。欲答喉先哽。一言難盡。一字半字

何堪聽。卿休矣。儂心省。迴腸寸斷。天乎何忍。恨不請上方一柄。把蠹蟲蟲。蕭蕭艾艾。斬除清淨。替幽蘭一洩香叢。忿。裴航短夢。罡風急。摩勒空拳。明月冷。只生平磊塊。與卿相等。莫道溫存。莫言酬應。願朝朝暮暮。深深款款。藥鑪邊。一閒參證。倘展得眉心一寸。三生幸。這熱血從教噴。眼前星運。浮生究竟。便病死算。卿儂倖。無故是桃花短命。要歡揚。掙扎得箇人兒。憐憫。莫造次把傷心殉。

病支離

甲辰歲暮爲李素仙小雙作時在濟南珍珠泉幕齋

舊夢今何在。又平地纏緜。添出許多磊塊。說甚癡迷。因甚果。事事奇奇怪怪。更不數眼前嗔愛。勸藥量茶。親檢點。溫衾膩枕。虛俛待。償不盡。相思債。天涯淪落同無奈。况阿儂思親淚盡。依人苦耐。劫後餘灰。萍化絮。誰與消除。罪礙。只合道天公硬派。病到膏肓。偏不死。心知緣孽。終難解。春似水。淚成海。

餞歲別

一病真成痼。聽杜宇聲聲。待喚人歸何處。虐雪漫天風卷地。冰骨稜稜如許。便者樣撐持得住。破膽應須拌此劫。顛聲淒絕無他語。儂應爾。汝何苦。眼前轉側心頭楚。也分明暫離小別。春來如故。只怕老天偏不肯。今夜竟成千古。早驚碎柔魂萬縷。似此不如真死樂。果然莫再來生誤。雞唱急。忍心去。

春差池

幾日年新舊。賸絲兒離魂。容易而今還有。多謝良朋無限意。花裏屠蘇盈斗。要解脫癡人僂僂。眼底春歸風雨惡。尊前阿滿笙歌驟。心已醉。那勝酒。宵深婢媪殷勤叩。道沈疴漸起。喜餘悲又。埋怨連朝青鳥誤。兩地猜疑不透。累阿姊親携翠袖。爲我權將虛榻拂。酬卿今夜孤衾守。夢啼苦。怪消瘦。

悼亡曲

戊戌仲春。作悼亡曲。其引曰。錦瑟空張。魂兮不返。總幃常掩。夢也難逢。

判年離恨天中。黔婁淚盡。鎮日落花風裏。奉倩神傷。枯墨不芳。長吟當哭。其詞曰。

此念何時已。臘鼓敲愁。錫簫吹恨。早又是經年矣。算阿儂薄倖無餘意。怎死尙
疑人恁爾。昨夜夢中嗚咽際。阿母驚呼。道兒是相逢夢裏。爲恐親心憂我甚。含
糊不敢真言是。眼枯也。波猶起。爲憶去年今日。多少恨。憑誰指。問卿卿半載。
夜臺孰似。已是傷心無斷處。忍把鴟絃重理。鐙前影畔。枕邊衾底。子規血。啼將
死。淋鈴雨。無休止。人生到此。甚的是奇男子。我本多愁。百般磨折。苦問天何以。

玉關寒

己亥臘初溝帮子新民廳旅夜書感

輪蹄半月。又拋過梅花暗香時節。驪唱未忘沾北雨。鴻飛不度遼西月。飲邨醪。
唾壺擊碎。轉恐醉後。愁腸易迴折。隔院何人。如儂幽怨。琵琶夜夜嗚咽。欵枕
無眠。挑鐙獨對。顫透寒衾重疊。苦中苦。客中客。眼前事。心頭血。墜歡未遠。輕塵

難越。真箇前身卿是我。到今生。我更愁卿熱。餘緣幾許。來生留與重結。

思歸曲

果是天心否。賸磊塊消餘。并作卅年倜傥。寒迫饑驅一萬里。離恨才人應有。怎獨我恁生難受。旅夢淹淹新歲去。親書數數歸期叩。揮淚盡。沾膺又。天南海北同回首。正晨昏寒鴉叫曉。冷蟾穿牖。已是身心無頓處。拌與臨場撒手。爭奈此情誰剖。異日勛名知有屬。負人肝膽儂歸後。恁然去。可能彀。

烏夜啼

烏夜啼。人民饑。北地赤千里。南方水漫梯。哀鴻嗷嗷絕衣食。霜雪已過春風欺。追捕征役不容殍。蒙袂竄走紛犬雞。急填溝壑僵載道。草深埋沒骨與屍。冲天怨氣黯星斗。獸不安窟鳥驚棲。烏夜啼。酸心脾。

烏啼夜。兵狼藉。將軍爭不休。健兒命當捨。丘山家業一砲空。珍寶嬌兒一槍射。

天心厭亂且好生。蒼黎何事罪不赦。鳩占覆其巢。累卵誰完者。劫大不容逃。威尊無假借。川湘碧血燕。遼魂贏得偉。人寸心野。烏啼夜。淚如瀉。

夜啼烏。走鬼狐。雁不叫。梟不呼。風聲藪藪樹森慄。月色荒荒天模糊。蛇欲吞其卵。狸欲啗其雛。老烏撲翅抵死拒。救之不得號且吁。羣稚多殲遺子羽。天明覓食將汝哺。歛息未忘喘。何來聲嗚嗚。毋乃繁冤魂。游嘯過林墟。厲不殺賊來驚鳥。餘生苟全鳥不如。夜啼烏。胡爲乎。

右爲民國九年庚申安武軍第五旅幕中作也。司令部卽故參將署。其後圃毘連省公署後園叢林灌莽。陰翳特甚。中多烏鵲。恆夜啼擾人酣睡。秋冬之交。澈夜喧囂。聲尤慘厲。適感時事。賦此三首。今日讀之。轉覺爾時所感淺也。

遲廬雜存

聯語類

笠雲錄草

題菱湖公園

辛酉夏爲史星珊統領作

一泓煙雨菱荇春。回是誰結構亭臺。點綴湖山成勝蹟。
十里郊垆鼓鼙聲靜。許我從容巾扇。平章風月作清游。

題奉直會館園亭

代星作

締造溯艱難。更從鳳水龍山。借取靈奇葺輪奐。
周流歷南北。好爲燕雲薊雨。招邀羈旅話鄉園。

挽陳明有

汝宣

君於父執多青眼。

我爲清門惜白眉。

挽安徽省長黃雋珊

家傑

論勳望在次公之上。晚尤節晉疆圻。鶉火乍周星。奈何荅尤參差奪吾生佛。其德澤於皖國獨多。我更感深知遇。龍山應勒石。待與梓桑父老痛哭使君。

又代友

名標館閣。節歷江淮。竹帛自千秋。循吏儒林宜合傳。下邑弦歌。公門桃李。山梁增一痛。感恩知己更何人。

挽章敬軒封翁

戊午冬

清望繫粉榆。高士純儒宜合謚。漫天劇風雪。親恩國計總悲觀。

挽甯仲謨

懷寧知事 代史統領作

袍澤託棠陰。倚戈聽犢劍。循聲牛刀治績。

輿歌驚薤露。揮涕看鏡鸞。慘切琴鶴淒清。

輓浙督楊以德

代史作 己未春

勛高柱石。望重粉榆。秋色黯鄉邦。千里寒催黃嶽雨。
光照旂常。恩深袍澤。將星隕原野。三軍淚咽越江潮。

輓甯資愚

代史作

治鹺偉績。調鼎先聲。一病竟無常。回首都教成夢幻。
折雁餘哀。騎鯨繼逝。九原如可作。忌才真欲問蒼冥。

又

看使君獨出冠時。鹽筴書成催賦鵬。
怪造物忌才慣例。滄桑夢短促搏鵬。

東流李子範 鴻文 服祖母喪。齊衰戚戚逾常容。爲余緬述其祖父某公從

軍殉難。祖母某太夫人撫孫持家之苦節。悱惻動人。書此志感。竊附論贊之義。非泛泛作輓詞也。

鷓啼血盡。馬革魂歸。未亡人慘切哀思。自非尋常節烈者可比。畫荻成名。含飴訓學。賢母氏延年備福。要從艱危痛苦中得來。

輓張次珊

夫人某氏後旬日亦歿

文林宗匠。勝國遺耆。行誼足千秋。鍾阜登車親有道。白髮齊眉。黃泉携手。後先剛十日。蓬瀛幢葆迓偕歸。

賀李仲平納寵

代史作

風月繫瓊枝。桃葉迎歸珠一斛。江城有金屋。楊花催趁燕雙飛。

輓馬母倪太夫人

皖南鎮守使馬聯甲之母代史作

荻書訓義。蘭檢題徽。福祿享耆年。國史宜增賢母傳。
節鉞啣哀。袍裳濺淚。軍民懷懿德。春笳淒咽皖江潮。

又代友作

繫賢母福備孫曾。壽臻耄耋。德更比於鍾歐。列笏奉安輿。忽憶蓬萊損祿養。
與長君始同蕊榜。繼訂苔岑。終且忝爲僚屬。囊弓拜慈幔。頓悲芻蕘悵春暉。

輓李劍秋

庚申夏

純孝合長年。思親竟以憂傷死。
工書亦名世。造物忌其志事成。

哭三姪繡夫

三弟泰雲勿遽携其病篤之兒。

其妾不容兒死於家

由鄂來皖。入室九小時卽氣絕。

時辛酉三月廿二日也。繡兒年甫廿三。距其長兄孝成之死已十年。

寒宗衰歇不堪言。十餘年哭汝兒淚尙未乾。天將殲盡吾良。一夕又成千古恨。塵世死生甯有定。數百里累老父躬携至此。我復德涼莫庇。九原應悔遠行非。

輓表兄孫北垣先生

廷輝

戚鄰兄弟行。兄年最高。德澤逮兒孫。驟憶蓬萊歸樂國。世局變遷後。杞憂日甚。老成又彫謝。睽懷桑梓重悲觀。

輓雯明二姪

紹熙

辛酉重九前二日

吾宗衰落不堪言。二百日父子繼殂。慘劫增貽萱室痛。塵世窮通何足數。五十載英華先謝。霜風吹徹竹林寒。

輓周慎慤公

馥字玉山

爵德比李文忠。而齒尤尊。於國於鄉。縷指勳名皆不朽。交游遍諸公子。識荆獨晚。從蘇從魯。愴懷恩遇更何人。

輓邱茂軒旅長長青

鼙鼓作商聲。百戰勛勞垂史冊。
囊韃思往日。三軍涕淚濺袍裳。

輓昭武上將軍姜翰卿

桂題 代史作

公爲勝國元戎。節鉞重耆年。方策功褒昭武傳。
我本朔方部曲。囊韃承舊澤。春笳聲咽皖江潮。

輓江子祥霖

視我若父師行。前路待扶持。三載相依塵夢短。
知君以憂憤死。痛心捐事蓄。九原猶恨命途乖。

又

軍前記載。豈得志者所爲。不圖死樂生憂。戲語而今成惡讖。

身後蕭條。置未亡人何地。況是時艱家難。痛心無計活諸孤。

哭馬子良

其駿

壬戌七月廿三日

大丈夫仗策從戎。修短存亡。早憑數定。所痛惜斯人斯疾。呼爺娘莫應。盼妻子不來。慘劫滯歸魂。風雨號秋。知不暝。當今世荆天棘地。憂危沈溺。何樂生爲。願爾我同德同方。既休戚相關。更切磨交勗。殘年偏後死。屋梁落月恨何窮。

又代史作

雄心未遂。痼疾旋攖。噩讖訝著龜。劫數蒼茫成恨事。十載相從。三軍所倚。時艱憂杼柚。股肱傷折惜良材。

輓靳鶴齡營長

剿匪陣亡

代史作

男兒馬革何傷。不圖小醜跳梁。一箭穿天將星墜。

時局蝸唐日亟。空負雄心報國。三軍揮涕陣雲寒。

輓黃良甫

生而爲英。死而爲靈。修短亦尋常。奈何客裏愁中。一病膏肓驚鶴化。
達不求官。窮不求利。老成又彫謝。太息人亡邦瘁。連朝風雨黯龍山。

輓許母朱太夫人

許世英省長之母

身兼福德。宜享大年。何圖仙樂宵驚。婺彩經天。捐鶴侶。
澤被鄉邦。推原賢母。正是去思歌起。慈雲歸岫。黯龍山。

烈士墓紀念聯

墓在安慶西北郊 代史作

春雨江城。勝游如舊。青山碧血。歷劫常新。

輓蘇銘之

致新 壬戌

天下事死生成敗無常。所惜出類清才。半世浮名多厄閨。

近年來故舊彫零殆盡。猶憶夜窗情話。前游如夢付輕塵。

輓閻式官代友作

六十年宦海升沉。麟閣逡巡鵬路迥。

三千里首邱歸正。鶻啼淒咽雁行孤。

又式官與我交頗篤。夏初安慶一別。竟成永訣。痛哉。癸亥仲秋。宿州軍次寄挽。

功名富貴。塵夢無憑。磨蠍厄黃楊。雲路崎嶇鵬翻倦。

福壽田園。生天何憾。脊鴿傷白首。秋風嘹唳雁鳴哀。

又代友作

起家禁籞。所歷多艱。比李廣不侯。解甲歸休。回首袍裳齊墮淚。
送別春江。竟成永訣。惟范叔知我。彈冠望斷。愴懷縹緲更何人。

輓剿匪陣亡將士

赤眉釀劫。碧血飛燐。誓當撲殺此獠。把邊境狼烽掃盡。
丹旄凝霜。白衣颭雪。頓使全軍皆墨。看男兒馬革歸來。

安慶周愨專祠禮成紀念

晚年書史林泉。在諸逸老中。卓爾千古。
吾皖功名福澤。繼李文忠後。巋然一人。

生輓邵曉邨

仁溥

操行好不可及。寫作好不可及。情性好更多不可及。得先民狷介遺風。爾室名
山。豈待蓋棺方定論。

軒冕中無此人。林泉中無此人。社會中亦幾無此人。是今日畸零分子。傷時厭
世。要持完璞惜餘年。

輓徐穉平

投袂奮功名。天厄勞人雖不逝。

征車棄塵埽。江懸落月鶴歸來。

哭姪孫開兒

丙戌花朝前一日

垂絕易衣忽睛動淚下

汝亦知臨訣酸心耶。何不請祖父母。與若父母。以及本生阿爺。憑世德宗功。要
求菩薩閻羅。再寬假一二十年天死。

我真悔久留塵世矣。計從哭兄夫婦。又姪夫婦。今更來痛孺子。問受生注命。到
底情魔孽債。須經過多少數次悲傷。

輓余壽平

誠格 代友

麟閣薜蘿荒。至今七澤遺。黎開府懸車談治績。
龍山薇蕨老。爲輯一囊諫草。臨江釀酒弔鄉賢。

輓鄔母余太夫人

丙寅

捧檄爲娛親。故里聞琴瑟。屋我瞻封鮠。範。
束芻慙薄奠。春風披拂。林皋愁聽孝烏啼。

輓陳夢樵世兄

議壇專席。塵劫逃禪。金箭負英奇。倦翮搏鵬雲路斷。
世德通家。鄉音話舊。登車劇零謝。驚魂唳鶴月梁寒。

輓孫懋齋表姪

履亨

名場奮迹。一夢經過。社祭感滄桑。堂構遺芬被蘭桂。
泮水同游。幾人健在。郵筒薦芻束。霜風吹唳灑葭葦。

輓馬文伯軍長

代友

一心黨國。百戰勳名。降虜噬仁明。談笑捐軀完大節。
兩載橐鞬。十年袍澤。同仇增義憤。倥偬解甲哭元戎。

輓楊漢昭

命運本無常。值茲棘地荆天。齋志埋憂何限憾。
親朋還有幾。同是衰年痼疾。感時傷逝不勝情。

輓邵曉村

壽考卽完人。得先民狷介。是社會畸零。概論早題生輓語。
名稱非易事。賸素問千金。與青氈一片。薪傳分與後賢承。

題新月軒

小築地宜新市隱。上元人亦月宮游。

輓鄰子徐某

中學。生上年賽跑優獎。其父某僅此一子。且有祖母在堂。平日喜吹笛。庚午夏。

奇病厄英賢。頓教玉笛銷聲。錦標遺憾。
鄰交增惋惜。況是烏啼飴冷。鯉去庭寒。

盈生泰新修門面題聯

盈天地間。供求相應。生解放後。泰侈何妨。

輓韓伯韋

鎡 庚午仲秋

晚歲厭皋比。不信憂傷能致死。
充楹有詩畫。況饒金石豈嫌貧。

輓朱讓泉

廉 其父八旬尙健在

奕世衍箕裘。詔促修文。慟鯉揮殘風燭淚。
同舟感萍梗。宵驚入夢。斷鴻淒絕月梁吟。

輓陳劍潭

澹然 清末應碩學通儒之徵

煙霞老我。箸作等身。閉戶足千秋。碩學通儒生有諡。
文字因緣。齒牙獎借。登堂增一慟。賞心抵掌更何人。

祝汪佩丞七十壽

清望地行仙。明月壺觴長樂老。

文壇鄉祭酒。春風杖履古稀年。

輓恂九三姪

紹思 辛未六月廿日

一場噩夢。慘迫桑榆。兵災水災疾疫災。眼前無限驚惶。我羨爾爭先解脫。兩
月鏢愁。追蹤泉壤。家事店事似續事。身後未完頭緒。兄與弟何計安排。其婦楊氏先兩月卒

章鑄黃續弦

蘭玉溫馨春正永。風雲催趁月重圓。

輓方公惕

子儻之子 代實兒作

從來才哲每無年。最難堪鯉去庭空。鴟啼夢斷。
同學英華偏早折。歎此後聽琴室冷。剪燭窗虛。

輓內弟婦陳楊氏

紹彭之妻

挽春賃廡。同經赤手艱難。蔗境待回甘。垂老何堪櫻痼疾。
行掖坐扶。曲盡白頭恩義。荆枝先告萎。悼亡無計慰鰥愁。

又代紹彭挽妻

七載感沉疴。謀醫藥。籲神祇。病榻扶持。力竭聲嘶增我痛。

卅年追往事。瘁身心。育子女。寒家搯拄。停辛茹苦負卿多。

輓鼎丞

代友挽其原配外舅

壬申春暮

是神仙歷劫人間。醉罷吟餘。自了塵緣歸大化。
倘父女相逢地下。今長昔短。應多絮語慰亡靈。

輓張秋白廳長

改友作

知己最難逢。左衽終身悲廖尉。

殉名何惜死。抽刀揮涕悼來侯。

輓胡淵如

遠濬

學道學佛學聖賢。著作見精心。編入名山應有謚。論詩論文論書法。勞謙思益友。愴懷同歲更何人。

哭長姪守齋

紹曾孝廉卒年七十 癸酉七月

亂世莫言文。吾叔姪坐此轆軻。生意早隨枯樹盡。寒宗待誰振。賢兄弟年來零謝。高枝又折竹林秋。

輓陳正有

汝湜 劭吾三子

艱危家國保持難。奇病厄中年。大士心腸般若果。戚故英賢彫謝盡。深情思往日。舊京風雪赭山秋。

贈柴映波

任安慶地方法院首席檢察官多年

明刑弼教皋陶聖。寡過知非伯玉賢。

贈宋紫楓

聖教通材兼六藝。名山餘緒注千金。

輓王友松之蘋之父

清望著鄉間。簪組歸休塵夢荒涼催鶴化。
孝思滯鍾阜。江天閤極霜風淒咽聽烏啼。

輓畢少齋茂卿之父年八十三任皖民政廳科長最久

倦幕效懸車。黃髮凝霜八有三春龍鶴化。
娛親非捧檄。斑衣霏雪一堂四世鳳麟翔。

輓劉菊坡夫人某氏

身兼福慧古今難。彤管終篇淑德幾人稱有壽。

望斷江天旌節近。縹緲歸悼。傷神獨立詠無題。

贈如皋沙俶周

沙炳元健庵之子

楹納五車天祿閣。堂開千頃米家船。

贈王仁山

樹榮

安徽高等法院首席檢察官別號戟髯溺於詩酒

甲戌上元後

廷尉平衡三尺法。謫仙斗酒百篇詩。

又

詩懷託興無今古。酒德稱名有聖賢。

輓熊鐵莊

宦游剛忠武年華。風雨春寒鵬路斷。

鍾阜有令威城郭。海天月落鶴魂歸。

輓徐江氏

磊生之妻

懿德佐名賢。式壺全功推治內。
福緣資淨土。離塵瑞相定生西。

題鄭養源等五人省葬禮成紀念

甲戌冬

劈空起革命第一聲。雷震驚八皖。
殉義如蘇州明五人墓。輝映千秋。

輓阮芷濱

宦海歷滄桑。萊綵從容林下樂。
人琴感風雨。棋枰冷落橘中游。

輓舒鐵薊

車笠憶同舟。製錦才長宦海波。濤鵬翮倦。
菩提參大乘。談經望斷江城風雨鶴魂歸。

輓友某

垂老值艱時。棘地荆天。我却羨君無疾死。
承家有賢婦。斷機畫荻。定能教子到名成。

輓薛母蔣太夫人

仲華之母

福壽著徽音。家乘增編宣室傳。

恩勤遺厚澤。表阡待續瀧岡文。

輓江叔海

丙子春 距其夫人歿恰半年

勝朝元老國學宗工。所志在千秋。嵩嶽爭傳舊開府。
淚灑觚稜。神傷總帳。相遲剛半載。靈輶有約大羅天。

輓呂怡笙

長鏞 兩江節署西圃日煦園怡笙於端午橋接待失禮拂袖竟去

同慕煦園中。長揖爭推風節。

聯語類

歸魂鍾阜外。小招賦就月梁寒。

先君行狀略述

先君徐公諱建生。字笠雲。別署律吟。晚號遲廬老人。安徽石埭人。民國紀元前四十三年（清同治八年）八月三日降生於南京。同懷三人。先君行仲。先伯縵雲公。暨先叔泰雲公。均先謝世。先娶陳太夫人。早逝。繼母袁氏。暨庶母崔氏。均健在。育女兒五。妹二十四一歲時。始生不孝。先君幼穎悟。讀書至勤。年未弱冠。入邑庠。食餼。旋試高等。文名藉甚。與先叔醉石公。每於鍾山文正尊經諸書院。月課。累列前茅。時人譽爲徐氏二龍。惜蹭蹬秋闈。數試不售。第僅入貢。科舉隨廢。遂絕此念。綜觀先君平生事業。不外作幕及教書二途。先後主山東撫署。兩江督署。軍務文案。安徽省長公署秘書。參議。皖北鎮守使署秘書長。國民革命軍江防司令。部書記官長。及南洋方言學堂。安徽高等學堂教員。安徽大學講師。爲家口所累。頻年奔走衣食。迄無暇晷。而對寫字有特嗜。非甚病不稍輟。幼年囿於行楷。弱冠學隸。斬於漢而阻於魏。筆姿不近。棄而學篆。四十年來。進退於秦唐二李間。不肯越。不肯雜。意在求真。志在見我。無論寒暑。迄未閒斷。有恆必成。信非虛語。片紙隻字。得者寶之。生性謹嚴。作文寫字。絕對不苟。鑒於前人作篆。任意自我作古。謬誤百出。深爲不滿。故歷年究心字學。力矯此病。識者稱爲前無古人。功力造詣。千古自有定評。先君一生精力所致。或卽爲名山不朽之作歟。

先君行狀略述

一〇六

有遲廬雜存一集。遲廬閒話一集。遲廬字話一集。遲廬小說一集。(名血兒傳已在安慶新皖鐸日報發表)篆字辨誤一集均未刊印。篆字巨製。先後書成金剛經二部。一贈安徽迎江寺。一贈廬山大林寺。其餘寫碑額楹聯甚多。惜均未影印行世。經此浩劫。文化垂絕。能不全毀。則萬幸矣。先君於民國廿六年秋。中日戰起。爲避免轟炸。由安慶城垣遷居桐城大龍灣。生活備嘗艱苦。精神日益頹唐。鄉居三年。雖文字酬應不輟。仍無倦意。不料二十九年一月。忽患痰喘咯血。雖經醫治。迄無功效。不幸於三月八日(即舊曆庚辰正月三十日)晨七時逝世。享年七十有二。嗚呼痛哉。先君未竟之志。厥爲修纂縣志家譜二事。邑人族人。屬望殷切。十年因循。未得就緒。現爲國難所阻。不能親手編修。賚恨以終。悲夫。以上所書。僅爲擷要備忘。不肖不文。況當苦塊昏迷之中。豈能紀述。先君於萬一。容俟大局收平。當求名儒撰題誌銘。以光泉壤。而垂不朽。此述。

中華民國二十九年四月五日不孝男實君泣述

誌謝

此冊爲先君遺稿之一。蒙鄉前輩陳一甫姻世丈慨出巨資倡印。又得歸潁川郡姑母任太夫人暨同鄉張寓鋒先生資助。共襄盛舉。又承何叔衡先生暨姻世兄孫琴柏軒賢昆玉不特加以資助。復爲之計劃印刷校勘。能於最短期間得觀厥成。全出諸仁者之賜。感切存歿。敬誌數語。以鳴謝忱。

男徐實君謹誌民國二十九年雙十節後三日